


國學基
本叢書 羅豫章集





書叢本基學國

集 章 豫 羅

撰彥從羅

行發館書印務商

中華民國二十六年五月初版

(86100)

E一六七二平

徐

本國學基羅豫章集一冊

每冊實價國幣壹角貳分

外埠酌加運費匯費

撰者 羅從彥

發行人 王上海河南路五

印刷所 商務印書館

發行所 商務印書館

上海及各埠

(本書校對者錢兆駿)

原序

由孔孟而下斯道之傳開於周子盛於二程而大會於朱子朱子繼周程之統者也顧其淵源一脈實自龜山而豫章而延平的然相承如河源之發於崑崙由積石歷龍門而東注以放於海也斯道之傳蓋匪偶然中閒若無潛思力行任重詣極如羅豫章先生者又安足以肩承先啓後之任乎先生爲人嚴毅清苦年四十一歲始受學於龜山之門計其時亦已晚矣夫學者惟無志於學則已有志於學雖其前之溺於流俗誤於歧趨者一旦親承大儒之訓翻然勃然即可以得乎吾性之所固有而聖賢之道求諸日用而無乎不在獨未有篤志求道如先生者耳當時龜山弟子千餘人何人不告以伊洛所傳之學乃一聞至論遂驚汗浹背自悔虛過一生非先生之篤志其孰能超然自拔如是且旣從龜山授業又裹糧走洛而見伊川旣得伊川指示又歸而卒業於龜山抑何求道之勇也迨後盡得龜山不傳之祕築室羅浮山中絕意仕進終日危坐以體驗天地萬物之理蓋其造道成德有非世人之所及知者矣先生之學傳之者李延平也常教延平靜中看喜怒哀樂未發時作何氣象蓋以寂然不動之中而天下萬事萬物之理莫不由是而出故必操存涵養以爲應事接物之本此龜山心法深得伊洛之傳者也延平答朱子問學必舉羅先生緒言相諄勉其謹師傳以成後學如是至朱子擴而充之致廣大盡精微使孔孟周程之旨融會歸一如萬派之朝宗於大海而先生居三傳之中一脈淵源的然有自亦如河之由積石歷龍門以

東注也。其承先啓後之功，豈不偉哉！先生少著述，惟遵堯錄、二程語錄及雜著議論要語，學者合而觀之，可以知先生之學；即可以知周程朱子相承之學矣。

康熙四十八年己丑孟冬穀旦，儀封後學張伯行書於榕城之正誼堂。

羅先生文集重刊序

君子之學務以講明道理。精思力行爲事。而文章詩賦。蓋非所先者。然或因事感物。而有所著述。發於心而不能自己者。要皆不外乎道理之正。於己無累。於人有規。則君子亦所不廢也。若夫娛戲風月。摹寫溪山。足以蕩心而逸志者。奚可尙哉。羅豫章先生。師事龜山楊文靖公。二十餘年。盡得不傳之祕。居鄉授徒。循道寂寞。晚始得官。爲博羅主簿。弗究厥施而歿。所幸者。有同郡李公愿中傳其學。斯文賴以不墜。再傳而得朱文公。其道遂大明於世。蓋先生清介絕俗。其學以誠篤不欺爲主。故傳於後。久而彌光。其生平所著詩文。又合乎道理之正。百世之下。讀之者。可知其爲人。然則先生之所著述。世不可無。如遵堯錄。議論要語。蓋其經濟之志之所寓。尤後人所當講誦而服膺者。惜經元季兵革散亂之餘。間有存者。亦惟束之高閣而已。騷人墨客。競以娛戲摹寫爲事。豈復知道理之言爲可貴哉。邵武太守南克馮侯考前在延平時。慕先生之爲人。搜訪遺文。得之民間。蓋元進士曹道振所編次者。首年譜次詩文。次附錄次外集。凡十八卷。重加考訂。刻版以廣其傳。及來茲郡。又載以隨。惟恐或失之。誠以道理之言。有補於世者。所當貴也。貴道理之言。則其爲政從可知矣。潛亦竊慕先生者。旣喜斯集之傳。俾後生晚學。得以因之考見其道。有所感焉而興。又欲後之嗣政於此者。知侯能以振文右道爲心。而弗替也。故僭序之。時成化七年春二月二十有八日。中順大夫。詹事府少詹事。兼翰林院學士。經筵官。同修國史。莆田柯潛序。

重刊羅先生文集序

天下有有德之言。有造道之言。有德者歸諸聖。造道者歸諸賢。夫聖不可尚已。聖而下者能幾何哉。是故流連光景。嘲弄風月。言之技也。勦取影響。掇拾緒餘。言之陋也。叛道背經。立門築室。言之蠹也。飾章繪句。踵謬承誤。言之雜也。有識君子皆陋之。即使或災於木。曰文矣。文矣。其何以信今而傳後耶。惟有精思力踐。超穎妙悟。遠承師傳。深契道體。微之而順情理性。顯之足以經世宰物。近之而章程一代。遠之則足以垂憲百世。小之而化家範國。大之則足以擴天地。橫四海。夫若是者。言之善歟。文之精歟。惟宋諸先生。自周濂溪。程明道。伊川。兄弟。鳴於西北閒。俾聖學大明。如日星麗天。江海行地。固爲世道慶。自龜山載道而歸也。程師卽喜之曰。吾道南矣。然或繼承匪人。抑何以演其源而揚其波耶。幸有豫章羅先生受業龜山之門。獨得不傳之祕。故自有先生之學。一傳而爲李延平。再傳而爲朱晦庵。由是海濱鄒魯於斯盛哉。乃今讀豫章之集。遵堯有錄。議論有要。語雜著有題詠。誨子姪有書文。夫皆起自身心。出於至誠。以爲心則善身。以化民。則善俗。以達天下。則善治。其有功於世教。豈小補云。余來董延郡庠。景慕先哲。披閱往訓。每以舊集。年久漫漶爲惜。庠生文明爲先生遺裔。乃取舊集新之。索余言以序。余嘉其能不墮祖德也。而紀諸首。時隆慶五年春三月初十日。延平府儒學教授分宜歐陽佑序。

宋史本傳

羅從彥字仲素，劍浦羅源人。曾祖文弼，祖世南，父神繼。從彥幼穎悟，不爲言語文字之學，及長嚴毅清苦，篤志求道。徒步往從楊時受業，見三日即驚汗浹背，曰：「不至是幾虛過一生矣！」時弟子千餘人，無及從彥者。嘗講易至乾九四爻，告以曩聞伊川說甚善。從彥即裹糧走洛，見而問之，頤反覆以告，亦不外是。乃歸卒業，盡得不傳之祕。時嘗語以今之學者，只爲不知爲學之方，又不知學成要何用。此須是著力來實見聖賢所得之道。若只要博古通今爲文章，作忠信慤慤，不爲非義之事，則古來如此等人不少。且如東漢處士名節有聞者多，責以古聖賢之道，則略無毫髮相似。以彼於道初未有聞故也。方今學者平居則曰：「吾當爲古人之所爲。」纔有事到手，便措置不得。由是觀之，學而不聞道，猶不學也。又嘗教學者讀書之法，以身體之，以心驗之，從容默會於幽閒靜一之中，超然自得於書言象意之表。蓋其所得者如此。時之壻沙縣陳淵，嘗詣之，必竟日乃返。語人曰：「自吾交仲素，日聞所不聞。其奧學清節，真南州冠冕。既而築室羅浮山中，絕意仕進，終日端坐以體驗天地萬物之理。閒謁時，將樂溪上吟詠而歸，充然自得。著《遵堯錄》，述祖宗以來宏規懿範，及名臣碩輔論建謨畫，下至元豐功利之人，紛更憲度，貽患國家，撮要提綱，無非理亂安危之大。其論治曰：『祖宗法度不可廢，德澤不可恃。』廢法度則變亂之事起，恃德澤則驕佚之心生。自古德澤最厚莫若堯舜，苟爲可恃，必傳其子。文武成康法度至明，向使子孫世守其遺緒，雖至今存可也。」

又曰君子在朝則天下治蓋君子常有亂世之言使人主多憂而善心生故治小人在朝則天下亂蓋小人惟效治世之言使人主多樂而怠心生故亂又曰天下之變不起於四方而起於朝廷譬如人傷元氣則寒暑易侵木傷蠹蝕則風雨易折故內有林甫盧杞之奸則外必有祿山朱泚之亂論士行曰周孔之心使人明道學者果能明道則周孔之心深自得之上世人才惟能如是故視死生去就如寒暑晝夜之常而忠義行之者易至漢董仲舒公孫弘倡言經術唐韓愈柳宗元誇尚古文二旨漸失周孔之心於是明道者寡視死生去就如萬鈞九鼎之重而忠義行之者難其議論醇正類此晚始就特科授博羅主簿卒於官年六十四世稱豫章先生湧祐聞謚文質一子敵敍

年譜

宋神宗熙寧五年壬子先生生於劍浦之羅源鄉。

按先生行實及羅革題語孟解後皆云先生享年六十四嘉定六年癸酉郡守劉允濟繳進遵堯錄狀云七十九年孤憤之氣鬱鬱未伸咸淳六年庚午馮夢得題先生文集云余後七十年而生又云自生髮未燥已知敬慕今六十五年矣以是知先生生於壬子歿於乙卯蓋六十四歲也。

哲宗元祐元年丙寅先生一十五歲

紹聖元年甲戌先生二十一歲

元符元年戊寅先生二十七歲

徽宗建中靖國元年辛巳先生三十歲

崇寧元年壬午先生三十一歲

大觀元年丁亥先生三十六歲

政和元年辛卯先生四十歲

二年壬辰先生四十一歲始受學於楊龜山先生之門

六年丙申先生四十五歲李延平先生來受學於門

七年丁酉先生四十六歲見楊先生於毘陵。
重和元年戊戌先生四十七歲自京師歸鄉。

宣和元年己亥先生四十八歲。

六年甲辰先生五十三歲作韋齋記。

欽宗靖康元年丙午先生五十五歲遵堯錄成。

高宗建炎元年丁未先生五十六歲。

紹興元年辛亥先生六十歲。

二年壬子先生六十一歲以特科授博羅縣主簿八月上丁以郡守周綰之命率諸生行釋菜禮。

五年乙卯先生六十四歲歿。

按先生行實及沙陽志皆云卒於官子敦敍早歿喪不得歸數年族人羅友爲惠州判官遣人護歸至汀州遇草寇竊發遂寄斂於郡之開元寺又數年門人李願中始爲歸葬於本郡羅源黃濟坑之原然先生族弟革題先生集二程語孟解後云享年六十有四自廣回卒於汀州武平縣龜山先生答胡康侯書亦云仲素死於道途又與前說不同。

寧宗嘉定六年癸酉郡守劉允濟繳進遵堯錄乞賜謚又得先生墓於荆榛之中爲修斂立石以表道架亭以行祀給官田以其租半給守墳半供祀事每歲寒食命教授率諸生致祭。

理宗淳祐六年丙午福建提刑楊棟請謚。

七年丁未賜謚文質。

明神宗萬曆二十九年辛丑賴汝充題請從祀。

三十三年乙巳徐學聚方良彥題請從祀。

三十七年己酉熊尙文題請從祀。

四十二年甲寅從祀聖廟稱先儒羅子。

皇朝康熙四十五年允學臣沈涵疏。

賜御書扁額曰奧學清節縣於祠。

羅豫章先生文集目錄

卷之一

遵堯錄一
序

卷之二

遵堯錄二

卷之三

遵堯錄三

卷之四

遵堯錄四

卷之五

遵堯錄五

卷之六

遵堯錄六

卷之七

羅豫章先生文集

目錄

遵堯錄七

卷之八

遵堯錄別錄

卷之九

議論要語

卷之十

雜著四道

詩二十七首

羅豫章先生文集卷之一

宋 羅從彥撰

遵堯錄序

堯舜三代之君不作也久矣。自獲麟以來訖五代千五百餘年。惟漢唐頗有足稱道。漢大綱正。唐萬目舉。然皆雜以伯道而已。有宋龍興一祖開基。三宗紹述。其精神之運。心術之動。見於紀綱法度者。沛乎大醇。皆足以追配前王之盛。故其規模亦無所愧焉。在太平興國初。太宗嘗謂宰相曰。朕嗣守基業。邊防事大。萬幾至重。當悉依先朝舊規。無得改易。仁廟見東封西祀。及修玉清宮過侈。曰。如此之事。朕當戒之。若二聖者。其知所以紹述者耶。故終太宗之世。無復改張。終仁宗之世。一於恭儉。至熙寧元豐中。不然。管心鞅法。甲唱乙和。功利之說。雜然並陳。宣和之末。遂召金人犯闕之變。蓋其源流。非一日也。今皇帝受禪。遭時之難。憫生民之重困也。發德音。下明詔。悉剗熙豐弊法。一以遵祖宗故事爲言。四方企踵以望太平矣。議者猶謂金陵之燭勢未能熄。天下皆其徒。是抱薪而救火者也。臣懼其然也。竊語諸心。曰。昔唐吳競作貞觀政要錄。本朝石介亦有聖政錄。豈苟然哉。因采祖宗故事。四聖所行。可以楷今傳後者。以事相比類。纂錄之。歷三年而書成。名曰聖宋遵堯錄。其間事之至當。而理之可久者。則衍而新之。善在可久。而意或未明者。則釋以發之。以今準古。有少不合者。作辨微以著其事。又自章聖以來。得

宰相李沆等及先儒程顥共十人擇其言行之可考者附於其後若乃創始開基之事廟謨雄斷仁心仁聞則於其君見之襲太平之基業守格法行故事竭盡公忠則於其臣見之爰及熙豐之弊卒歸於道分七卷添別錄一卷合四萬餘言欲進之黼座力未暇及而秋毫之間已爽忽矣然事固有始曖而終合失之於前而得之於後者古人有之若周成王楚文王秦穆公是也不久朝廷清明敵人竄伏且當有以來天下之言輒紀歲月以俟采擇靖康丙午十月日延平臣羅從彥序

遵堯錄一

太祖

國初劍南交廣各僭大號荆湖江表止通貢奉西域北方皆未賓服太祖垂意諸將命李漢超屯關南馬仁瑀守瀛州韓令坤鎮常山賀惟忠守易州何維筠鎮棣州以拒北寇又以郭進控西山武守琪戍晉州李謙溥守隰州李繼勳鎮昭義以禦太原趙贊屯延州姚內斌守慶州董遵誨屯環州王彥昇守原州馮繼業鎮靈武以備西敵其家屬在京師者撫之甚厚郡中管榷之利悉以與之恣其周回貿易免所過征稅許令招募驍勇以爲爪牙凡軍中許便宜行事每來朝必召對命坐賜以飲食錫賚殊異以遣之由是邊臣皆富於財得以養募死士使爲閒諜洞知邊境情狀每寇至必豫爲之備設伏掩擊多致克捷二十年間無西北之憂以至命將出師弔民伐罪平西蜀復湖湘下嶺表克江南兵力雄盛武功蓋世良由得猛士以守邊推赤心以御下之所致也

太祖以李漢超爲關南巡檢使。捍北敵。與兵二千而已。然以齊州賦斂最多。乃以爲齊州防禦使。悉與一州之賦。俾之養士。而漢超武人所爲多不法。久之。關南百姓詣闕訟。漢超貸民錢多不還。及掠其女以爲妾。帝召百姓入見便殿。以酒食慰勞之。徐問曰。自漢超在關南。契丹入寇者幾。曰無也。帝曰。往時敵兵入寇。邊將不能禦。河北之民歲遭劫掠。汝於此時能保其貲財婦女乎。今漢超所取。孰與北敵之多。又問訟者曰。汝家幾女所嫁何人。百姓具以對。帝曰。然則所嫁皆村夫也。若漢超者。吾之貴臣也。以愛汝女。則取之。得之必不使失所。與其嫁村夫。孰若處漢超家之富貴也。於是百姓感悅而去。帝使人語漢超曰。汝須要錢。何不問我。而取於民乎。乃賜以銀百兩。曰。汝自還之。使其感汝也。漢超感泣。誓以死報。

太祖以郭進爲西山巡檢。有告其陰通河東劉繼元。將有異志者。帝大怒。以其誣告忠臣。命練其人予進。使自處置。進得而不殺。謂曰。爾能爲我取繼元一城一寨。不止免爾死。當請賞爾一官。歲餘。其人誘其一城來降。進具其事送之於朝。請賞。帝曰。爾誣害我忠良。此才可貫死。爾賞不可得。命以其人還進。進復請曰。使臣失信。則不能用人矣。於是賞以一官。

太祖以賀惟忠知易州。及捍邊有功。遷正使。開寶二年。又加本州刺史。兼易定祁等州都巡檢使。惟忠在易州十餘年。繕治亭障。撫士卒。得其死力。每乘塞用兵。所向必克。威名震於北方。

太祖以李謙溥爲隰州刺史。在州十年。并人不敢犯其境。開寶三年。移齊州團練使。後邊將失律。復以謙

溥爲晉陽沿邊巡檢邊民喜之。

太祖登寶位日有司捕得北敵二人帝曰汝等皆何人耶曰契丹遣來探事耳帝曰汝探國事不過甲兵糧草百官數目而已若朕腹中事汝可探乎特赦而遣之二人叩頭感泣而去。

太祖建隆初邊郡民有出塞外盜馬至者官給其直帝曰安邊示信其若此耶亟命止之還所盜馬自是外人畏服不敢犯塞。

開寶八年三月北人遣使克妙骨謹思奉書來聘對崇德殿其從者十二人皆賜冠帶器幣太祖曰晉漢以來北方強盛蓋由中朝無主晉帝蒙塵否運已極今慕化而來亦由時運非涼德所致也召見講武殿觀武士習射又燕長春殿。

建隆元年太祖遣戶部郎中沈倫使吳越歸奏揚泗饑民多死郡中軍儲尙有百餘萬斛可發以貸民至秋復收新粟有司沮倫曰今以軍儲賑饑民若歲洩饑無所收取孰任其咎帝以問倫倫曰國家以廩粟濟民自古召和氣而致豐稔豈復有水旱耶此當決於宸衷帝卽命發廩貸民。

臣從彥釋曰人君之所以有天下者以有其民也民之所恃以爲養者以有食也所恃以爲安者以有兵也書曰民爲邦本本固邦寧昔孟軻氏以民爲貴貴邦本也故有民而後有食有食而後有兵自子貢問政孔子所答觀之則先後重輕可知矣太祖建隆初揚泗饑民多死者沈倫請發軍儲以貸之此最知本者也況軍儲又出於民乎夫以廩粟賑民固有召和氣致豐稔之道然水旱無常萬

一歲游饑無所收取倫之言未爲不信也嗚呼太祖可謂善聽言者也

太祖嘗擇官使江南頗難其人一日謂盧多遜曰李穆士大夫之仁善者詞學之外他無所預多遜曰穆履行端直臨事不以死生易節所謂仁而有勇者也帝曰若如爾言使江南無以易穆者遂遣之太祖命諸將西征以地圖授王全斌等謂之曰西川可取否全斌曰臣仗天威遵廟筭剋日可定龍捷都校史延德奏曰西川除在天上卽不能得若舟車足迹可至以今之兵力到卽平爾帝壯其言謂全斌曰汝等果敢如此朕復何憂卿發計日望捷書也所破郡縣止籍其器甲芻糧當爲朕傾帑藏賞戰士耳故西師所向人皆效命動有成功若席卷之易

王全斌收蜀沈倫以給事中爲隨軍水陸轉運使王全斌等入成都爭取玉帛子女倫獨廉清無欲僞蜀羣臣有以珍異奇巧之物爲獻者皆拒之東歸篋中所有才圖書數卷而已帝悉知之遂貶全斌等以倫爲戶部侍郎樞密副使

開寶九年召隨州留後王全斌授寧武軍節度使初全斌以伐蜀私取財物貶秩至是帝謂之曰朕以金陵未下常慮平吳諸將恣行貪暴抑卿數年爲朕立法江南旣平還卿旄鉞又別出器幣錢貨數萬賜之

趙普秉政時江南後主以銀五萬兩遺普普白太祖太祖曰此不可不受但以書答謝少賂其來使可也普叩頭辭避帝曰大國之體不可自爲削弱當使勿測旣而後主遣其弟從善入貢常賜外密賚白金

如遺普之數。江南君臣始大震駭。服帝偉度。

太祖將征江南。李煜遣其臣徐鉉朝於京師。鉉以名臣自負。其來也。欲以口舌馳說存其國。日夜計謀思慮。言語應對之際詳矣。及其將見也。大臣亦先入請。言鉉博學有才辨。宜有以待之。帝曰。第去。非爾所知也。明日鉉朝。曰。煜以小事大。如子事父。未有過失。奈何見伐。其說累數百言。帝曰。爾謂父子爲兩家可乎。鉉無對而退。

太祖征江南時。錢俶遣幕僚黃夷簡入貢。召謂之曰。汝歸語元帥。訓練甲兵。江南倔強不朝。我將發師討之。元帥當助我。無惑人言。皮之不存。毛將安附也。及江南平。又召兩浙使。謂曰。俶克昆陵有大功。今當暫來與朕相見。以慰延賞之意。即當遣還。不久留也。朕三執珪幣。以見上帝。豈食言者乎。

嶺南劉鋹。性純巧。嘗自結真珠羣。爲戲龍之狀。以獻太祖。臻於奇妙。帝厚賜之。謂左右曰。移此心以勤民政。不亦善乎。鋹初在國中。多置酖以毒臣下。帝幸講武池。從官未集。鋹先至。詔賜卮酒。鋹心疑之。捧杯泣曰。臣承祖父基業。違拒朝廷。煩王師致討。罪在不赦。陛下旣待臣以不死。願爲大梁布衣。觀太平之盛。未敢飲此酒也。帝笑曰。朕推赤心置人腹中。安有此事。卽取酒自飲。別酌以賜鋹。鋹慚謝。

左飛德使李承進。嘗事後唐莊宗。太祖召承進問曰。莊宗以英武定中原。而享國不久。何也。承進曰。莊宗好田獵。將士驕縱。惟務姑息。每乘輿出次近郊。禁兵衛士必控馬首。曰。兒郎輩寒冷。望與救援。莊宗卽如所欲給之。若是者非一。因而召亂。蓋威令不行。而賞賚無節所致。帝撫髀歎曰。二十年夾河戰爭。取

得天下不能以軍法約束此輩縱其無厭之性以茲臨御誠爲兒戲朕撫養士卒固不吝爵賞苟犯吾法惟有劍耳

太祖收蜀得將士之精者置川班殿直廩賜優給與御龍直等開寶四年祀南郊禮畢行賞帝以御龍直扈從郊祀特命增給錢人五千而川班殿直不得如例乃擊登聞鼓院上訴陳乞帝怒遣中使謂之曰朕之所與卽爲恩澤又焉有例命斬其妄訴者四十餘人遂廢其班

太祖初定天下埽五代之失日不暇給矣然猶命汪徹定宗廟竇儀典禮儀聶崇義正禮器和峴修雅樂覽訪儒術疊咨治道建隆元年太祖幸國子監因詔修飾祠宇及塑繪先聖先賢先儒之象帝親撰文宣王、堯國公二贊二年以右諫議大夫崔頤判監事始聚生徒講學遣中使以酒果賜之謂侍臣曰今之武臣欲盡令讀書貴知爲治之道

國初取士宗伯之司曠而未設但擇名臣有聞望於禁掖臺省者權典之太祖嘗謂近臣曰聞及第舉人呼有司爲恩門自稱門生見知舉官輒拜之此甚薄俗非推公取士之道又搢紳間多以所知進士致書主司謂之公薦朕慮誤取虛譽當悉禁之翰林承旨陶穀以子邴及第詣閣門謝帝謂左右曰聞穀不能訓子安有登進士第者亟命中書覆試自今貢舉人有父兄食祿者奏名之時別拆之

乾德元年詔舊置制舉三科其一曰賢良方正能直言極諫其二曰經學優深可爲師法其三曰詳嫻吏理達於教化并許州府解送吏部試論三道若二千字已上取文理優長者登焉

建隆四年將行南郊之禮。太祖謂范質曰：中原多故，百有餘年，禮樂不絕如綫。今天下無事，時和年豐，務在報神，資乎備禮。卿等宜講求遺逸，遵行典故，無或廢墜。副朕寅恭之意。

開寶九年太祖幸西京，有事南郊。先時霖雨彌旬不止，至是雲物晴霽，觀者如堵。垂白之民相謂曰：我輩少屬離亂，不圖今日復覩太平。天子儀衛至，相對感泣。駕還，御五鳳樓大赦。有司請正一統太平之號。帝曰：今河東未平，幽薊未復，而以一統爲號，無乃不可乎？雖僭位漸已克定，若云太平，朕所慚也。

國初天下貢賦盡入寶藏庫，乾德中所積充羨。太祖顧左右曰：軍興饑饉，須豫爲之備。若臨事厚斂，非長計也。當於講武殿後別爲內庫，以貯金帛。

開寶二年秋，有司言太倉貯廩止於明年二月，請分屯諸軍，仍率民船以資江淮糧運。太祖大怒，切責計司曰：國無九年儲，曰不足。汝不素爲計度，而使倉儲垂盡，乃使分屯兵師括率民船以餽運，是可卒致乎？且設爾等何用？苟有所闕，必爾乎？取之三司使楚昭輔、皇懼計不知所出，乃詣晉邸見太宗，乞於上前解釋，稍寬其罪，使得盡力營辦。帝許之。

太祖在周朝知李昉名，及卽位，任以爲相。因語昉曰：卿在先朝，未嘗傾陷一人，可謂善人君子者也。王著罷職翰林，太祖謂宰相曰：學士深嚴之地，當選謹重之士處之。范質曰：竇儀清介謹厚，然在先朝，由翰林學士遷端明，今又官爲尙書，難於復召。帝曰：禁中非此人不可。卿當諭以朕意，勉赴所職。儀於是再入翰林。

錢昱自白州刺史求文資得祕書監連典數郡無治聲太祖謂宰相曰此貴家子不可任丞郎改郢州團練使

大理評事陳舜封因奏事語頗捷給類倡優帝問誰之子舜封自言其父承業爲教坊都知帝曰此雜類安得任清望官蓋執政不爲國家區別流品所致改授殿直教坊使有衛得仁者以老求外任官且援同光故事求領郡太祖曰用伶人爲刺史此莊宗失政也豈可效之耶中書擬上州司馬帝曰上州之佐乃士人所處資望甚優亦不可輕授止可於樂部轉遷耳乃授太樂書令

太宗在晉邸時嘗以錢五百千遺中丞劉溫叟溫叟不敢辭貯於別室明年重午又以角黍遺之使人至見前所送錢局牖如故還白其事太宗曰我錢尙不用況他人乎溫叟真廉士也哉亟命輦返密白於太祖太祖曰執廉節鎭澆風溫叟有之

太祖聰明英睿善知人下位中有一行可觀一才可稱者皆自聖知不次拔擢嘗以中牟縣令李鶴爲國子監丞延州錄事參軍段從革爲贊善大夫定州錄事參軍郭思齊爲太子中允河南節度判官石雄爲補闕萊蕪縣令劉琪爲拾遺安丘縣尉張邈爲將作監丞鄭州防禦判官李搏爲監察御史當時州縣無滯才朝廷稱得人焉

太祖初有天下欲知外事用隰州刺史史珪察訪珪招權通奸欲有所欺德州刺史郭貴部下爲奸通判

大理評事梁夢昇陰持之以是事多違戾貴無如之何貴與珪素善因以其事告珪珪乃記其事於尺牘欲伺便言之一日帝忽言今中外所任皆得其人珪乃曰今之文臣亦未必皆善乃探懷中尺牘奏之曰祇如德州通判梁夢昇欺蔑刺史幾至於死帝曰非刺史有奸贓乎夢昇眞清強吏也因以尺牘授左右曰持此付中書以夢昇爲贊善大夫尋出珪於外

乾德中金部郎中段思恭通判眉州會大兵之後亡命結集羣盜蠭起逼州城刺史趙延進懼賊之衆力不能禁將以麾下奔嘉州思恭止之因率屯兵與賊戰彭山軍士觀望無鬪志思恭募先登者旌以厚賞於是諸軍鼓勇力戰羣賊敗走思恭矯詔以上供錢帛給之後度支以擅用官錢請繫獄治罪帝嘉其果幹勿劾令知州事

太祖以右贊善大夫錢文敏知瀘州召見講武殿謂曰瀘州最近蠻獠猶宜綏撫聞知州葛思齊兵馬監押郭重遷等掊斂於民頗爲不法恃其地遠謂朝廷不知爾至爲朕鞠之苟有一毫侵民朕必不赦乾德四年太祖宴宰相樞密使開封尹兩制等於紫雲樓下論及民間事謂趙普曰下民之愚雖不分菽麥如藩侯不爲撫養務行苛虐朕斷不容之普對曰陛下愛民如此堯舜之用心也臣等不勝大幸

開寶初宴藩臣於內苑酒酣太祖曰卿等國家舊臣能悉心藩鎮以惠民爲意乎獨王彥超進曰臣素無功能出於遭遇臣年已衰朽願歸丘園臣之志也丘園一本作兵柄武行德向拱郭義袁彥等爭論疇昔功勳帝曰前朝異世事安足論也翼日皆罷鎮授以環衛

太祖修大內既成。寢殿中。令洞闢諸門。使皆端直開豁。無有壅蔽者。因謂左右曰。此如我心。小有邪曲。人皆見之耳。

臣從彥釋曰。人君者。天下之表。若自心正。則天下正矣。自心邪。何以正天下。太祖於寢殿中。令洞闢諸門。使皆端直開豁。無有壅蔽。以見本心。可謂知君道矣。夫闢四門。明四目。達四聰。堯舜之道也。若太祖可謂近之者也。

太祖嘗盛暑中露臥。抵夜。左右請避之。曰。星月之下。不可露臥也。帝曰。常人之情。覩星月爛然。則生悚畏。至於闈室得欺之乎。

太祖一日朝罷。御便殿坐。俛首不言者久之。內侍王繼恩進曰。陛下退朝。略無笑語。與常日不同。臣不知其故也。帝曰。爾謂帝王可容易行事耶。旦來前殿。我乘快指揮一事。偶有誤失。史必書之。我所以不樂也。

太祖初好弋獵。常狩於近郊。逐走兔。馬蹶而墜。以所佩刀刺殺所乘馬。旣而悔之。曰。吾爲天下主。而輕事田獵。非馬之罪也。自此遂不復獵。

魏國長公主嘗衣貼繡鋪翠襦。入宮中。太祖見之。謂主曰。汝當以此與我。自今勿復爲此飾。主笑曰。此所用翠羽幾何。帝曰不然。主家服此。宮闈戚里相視亦競爲之。京城翠羽價高。小民逐利。展轉販易。傷生浸廣。實汝之由。主慚謝。後因侍坐。與孝章皇后閒言曰。官家作天子。日久。豈不能用黃金妝肩輿。乘以

出入帝曰我以四海之富宮殿悉以黃金飾之力亦可辦但念我爲天下守財耳古語云只以一人治天下不以天下奉一人苟以自奉養爲意使天下之人何仰哉

太祖常言天命所屬王者不死周世宗每見將帥容貌魁壯爲士心所附者率多疑忌見人之形氣磊落者多因事誅之而朕日侍其側都不爲慮凡帝王固當推心待下豈可以臆度而濫刑誅若夫命數之所鍾亦非人謀之能屏故開寶之前惟殿前都虞侯張瓊以忤晉邸伏法外未嘗輒誅大臣

陶穀爲學士嘗晚召對太祖御便殿坐穀至望見上前而復卻者數四左右推宣甚急終彷徨不進帝笑曰此措大索事分顧左右取袍帶來帝已束帶穀輒趨進

臣從彥辨微曰學士職親地禁非謹重之士有器識文章者不可居其任陶穀不知爲如何人其在翰林也太祖御便殿坐召之前卻不進卒使天子致禮於詞學之臣束帶以見之此其廉恥有足稱者非特穀也古者君臣之間禮義廉恥而已矣上知有禮而不敢慢其臣而下知廉恥以事其君上下交修則天下不足爲也

太祖朝臣僚有功當進官帝不喜其人欲勿進趙普力請之帝怒固不與轉官普爭之曰賞者聖人所以勸善罰者聖人所以懲惡夫爵賞刑罰乃天下之爵賞刑罰也非陛下之爵賞刑罰也陛下豈得自專之耶帝不能容乃拂衣起普亦隨之帝入宮門普立於宮門不退帝乃悟卒可其奏
臣從彥辨微曰賞罰者人主之大柄也賞所以勸功罰所以懲罪天下共之太祖時臣僚之有功當

進官此天下之大公也。帝不喜其人欲勿進。此蔽於私者也。普力請之。至犯帝怒。普之言賞罰。蓋合天下之大公。無可貶者。然古之善諫者不然。優游不迫。因其所明而道之。則其聽之也易於反掌。故評直強勁者。率多取忤。而溫厚明辨者。其說多行。若普者。不遇剛明之君。能勿觸鱗乎。嗚呼。太祖真大度有容者也。雖不免於私。然亦不能塵其光明也。

太祖一日後苑挾弓彈雀。臣僚中有一人稱有急事。請見帝。亟出見之。及覽奏乃常事耳。帝怒曰。此何爲急事。其人曰。亦急於彈雀。帝以斧鉞柄撞其口。兩齒墜焉。其人徐跪地。取齒置於懷中。帝曰。汝持此齒訟我耶。曰。臣不敢。訟陛下。自有史官書之。帝怒解。於是賜以金帛慰勞而遣之。

臣從彥辨微曰。古者忠臣之事君也。造次不忘納君於善。有翦桐之戲者。則隨事箴規。達養生之戒者。則卽時戒正。不敢嘿也。太祖於後苑挾弓彈雀。當時臣僚中有以急事請見者。豈近是耶。及犯帝怒。因以齒之墜也。而倣以史官使人君動作不敢非禮。莫大之益也。

太祖嘗患趙普專政。欲聞其過。一日召翰林學士竇儀語及普所爲多不法。且譽儀早負才望之意。儀盛言普開國勳臣。公忠亮直。社稷之鎮。帝不悅。儀歸家。召其諸弟。張酒席語曰。我必不作宰相。然亦不詣珠崖。吾門可保矣。旣而召學士盧多遜。多遜嘗有憾於普。又喜其進用。因攻普罷之。出鎮河陽。普之罷甚危。賴以舊勳脫禍。多遜遂參知政事。作相。太平興國七年。普復入相。多遜有崖州之行。臣從彥辨微曰。趙普才器過人。其謀斷足以立事成功。若其嵒政。則信必有之。以太祖之大度有容。

而惡其專至召儀等問之則普之所爲可知也已古者進退人臣自有道而宰相者乃輔天子以進賢退不肖者不可不謹也普身爲宰相使帝不得直道而行徒以勳舊脫禍而多遜代之詩曰公孫碩膚赤鳥几几普則愧之矣

太祖嘗幸華州至龍興觀賜道士蘇澄隱衣一襲銀五百兩絹五百匹澄隱戒行精至性穎悟博涉經史兼通釋典帝問曰師年踰八十而容貌甚少是能養生也宜以其術教朕對曰臣之養生不過精思鍊氣耳若帝王養生則異是老子曰我無爲而民自化我無欲而民自樸無爲無欲凝神太和在昔黃帝享國永年者得此道也帝大悅故有是賜

臣從彥辨微曰賜予雖出於人君之仁要受賜必有以稱之可也澄隱善養生吐談可喜不肯以其術市恩以誤至尊其論帝王養生則以無爲無欲凝神太和者言之此羽衣中之最賢者也帝命賜衣一襲足矣至若金帛之賚似未有以處之澄隱不知固辭何也蓋方外之士與儒不同辭受取舍非所以責澄隱也

羅豫章先生文集卷之二

遵堯錄二

太宗

太宗初命趙普爲相諭之曰朕以卿先帝舊臣功參佐命卿宜悉心以副朕意但能謹賞罰舉賢能弭愛憎何慮中國不治朕若有過卿勿面從古人恥其君不及堯舜其勉之哉他日謂近臣曰趙普事先帝與朕最爲故舊能斷大事傾竭自效盡忠國家真社稷臣也

雍熙三年太宗謂宰相曰中書樞密院朝廷政令所出治亂根本繫之於茲卿等當各竭公忠以副任用大凡常人之理未免姻故之情苟才不足稱遺之財幣可也公家之事不可曲徇朕亦有親舊若才用無取未嘗假以名器也

淳化五年夏四月太宗謂蒙正等曰朕以宰相之任所職甚重欲修唐朝書考故事以責卿等輔佐之效又念考第之設亦空言耳莫若撫中外和陰陽使百度大理一人端拱無事此宰相之職也豈有居其位而不知其任乎

至道元年夏四月擢呂端同中書門下平章事帝召端謂曰廟堂之上固無虛授但能進賢退不肖便爲稱職卿宜勉之端歷官識大體今雖進擢帝以謂任用之晚每奏對同列多出異議因出詔諭之曰自

今中書事必經呂端詳酌乃得奏聞。

臣從彥釋曰太宗之命呂端也說者謂宰相之任在乎登進賢才黜遠庸佞而總其綱目萬事自理故曰天子擇宰相宰相擇百官非才之人不可虛授其言是已若太宗者其知所以命相者歟端賢相也帝以其任用之晚且患同列之多異議也因出詔諭之曰自今中書事必經呂端詳酌乃得奏聞非信任之篤遇之耑一者其孰能之

端拱中考工員外郎畢士安爲冀王府記室參軍有詔臣僚各獻所爲文太宗閱視累日問近臣曰其文可見矣其行孰優有以士安對帝曰卿言正合朕意命以本官知制誥

太宗尤重內外制之任每命一舍人必咨問宰輔求才實兼美者先召與語觀其器識然後授之後因覽唐故事見其多自卑位作學士者會蘇易簡薦吳人浚儀尉周亨俊拔可任帝俾易簡索其文章得白花庭賦閱之語易簡曰可日令敍遷京秩更徐觀之改光祿寺丞卒

太子中舍王濟方正好言事太宗謂宰相曰法官尤宜謹擇苟非其人或有冤濫感傷和氣必致天災宰相曰惟守法不回者可符聖意帝曰王濟數言事必有特操可試之遂令權判寺事

太宗選祕書丞楊延慶等十餘人分爲諸州知州因謂宰相曰刺史之任最爲親民非其人則下有受其弊者昔後漢秦彭爲潁川郡守教化盛行百姓懷惠乃有鳳凰麒麟嘉禾甘露之瑞以一郡守尙能有感若帝王崇尚德教豈太平之不可致而和氣之不可召也

道化五年夏五月太宗謂宰相曰諸州長吏所委尤重審官院進所選朝京官充知州者三十餘人御前印紙歷子朕親書於其前曰勤公潔己奉法除奸惠愛臨民方可書爲勞績本官月俸並給實錢令知審官院錢若水分賜之因謂若水曰所賜戒諭有奉法除奸之語恐不曉者從而生事以求功勞可諭之云除奸之要在乎奉法耳

太宗初常詔轉運使考按諸州凡諸職任第其優劣未幾復遣使分行州縣廉察官吏是歲五月河南官法曹參軍高伾伊闕縣主簿翟嶧鄭州滎澤縣令申廷溫皆以罷輒不勝任惰慢不親事免官至道中分遣朝臣爲諸道轉運司承受公事以察州縣刑政官吏治蹟更次入奏三年供奉官劉文質入奏察舉兩浙部內官高輔之李易直文仲儒梅甸高鼎廖遺慶姜嶼戚綸等八人有治績并降璽書褒諭之

太宗嘗謂宰相曰歷代王者多以求賢爲難何代無材但繫用與不用耳豈必畋游夢卜乃稱賢哉

太宗嘗謂近臣曰國家選才最爲切務人君深居九重豈能徧識之哉必須采訪苟稱善者多即是操履無玷但擇得一好人爲益無限古人云得十良馬不如得一伯樂得十利劍不如得一歐冶茲言有理朕孜孜諮詢只要求人庶得良才以充任使趙普曰帝王進用良善實太平之基然君子小人各有黨類不可不察也帝然之

太宗嘗謂近臣曰國家取士必歷級而升下位之人韜晦才行誠亦有之當勿以此爲限成朕急賢之意

又曰人之行實不以位之高下雖卑秩下位不可謂無良士然君子含章守道難進易退不求聞達朕嘗患其不能知也呂蒙正曰迭試可任則能否洞分帝曰若善惡則不可得而知矣曰亦迭試可也苟暫聞其善惡有涉愛憎恐誤任使故須久而察之則賞罰不濫矣帝然之

太平興國中太宗謂宰相曰邇來貢舉混雜乃有道釋之流還俗赴舉此等不能耑一其業他日居官必非廉士進士須先通經術遵周孔之教亦有迭相倣倣止習淺浮文章殊非務本之道也當下詔切責之

端拱二年太宗親試進士得陳堯叟等並賜及第仍作箴賜之勉以修身謹行稽古效官之意三年親試得孫何等面戒之曰汝等苦學登科朕方以文治天下王事之外勵精文翰無墜前功命以儒行篇賜之俾爲座右之戒

太宗嘗謂近臣曰朕雖寡薄乘戰爭之後孜孜求治未嘗不欲加惠於民若杜兼并抑游惰前世難行之道朕當力行之十數年間家給人足庶可致矣政無巨細欲速成者必無其效苟以道德化民成俗未可以歲月冀也

太宗嘗謂宰相曰井田之制實經國之要道後世爲天下者不爲井田則貧富不均王化何由而行自秦滅廬井置阡陌經界廢而兼并作漢魏以降民受其弊久矣朕臨大寶軫念黎庶雖井田之制不可卒復因時創法漸均貧富則朕別有規制終當行之以安四海

太宗嘗覽鄭州何昌齡均田疏語近臣曰土著之民若一一均平選通達物理之官周知人閒利害者精於制置使稍近古自然衣食豐足盜賊自消供賦可從而省也彼管榷之利何所用哉俟五七年間當力行之此朕之志也寇準曰均田之法隋文尙能興復况聖代乎

端拱中太宗謂宰相曰燕射之禮廢之已久朕欲恢復古道當令有司講求儀法俟弭兵與卿等行之至道元年太宗謂侍臣曰朕嘗求古之制度思欲振復而亡者十有七八古者衣裳冠冕皆有法象所以檢束人之容貌動遵典禮漢魏以來隨時所尚屢經變易近代服飾去古逾遠舊制罕存誠可惜也寇準曰古者行步則有環佩之聲升車則有鸞和之音所以節人心而昭禮制也若今所服之鞚乃趙武靈胡服公私通用之與古之履烏殊矣

太宗初卽位謂宰相曰朕嗣守基業邊防耑大萬機至重當悉依先朝舊規無得改易

太宗嘗謂近臣曰朕生於亂世南北紛爭一本作大之日已七八歲當時道路泥濘人民艱苦謂更無好時世孰謂今來萬事麤理常自愧惕近者蕩平寇擊於朕何功蓋上天開悟朕心使之克勝侍臣曰古者天子有道推德於天今之聖諭正合古道

太宗嘗語近臣曰國之上瑞惟在豐年頃者五穀屢登人無疾疫朕求治雖切然而德化未孚天貺若此能無懼乎

雍熙元年夏五月太宗幸城南因謂近臣曰朕觀五代以來帝王其始莫不勤儉終則忘其艱難恣於逸

樂不恤士卒自生猜貳覆亡之禍皆自貽也在人上者豈得不以爲戒。

淳化三年祕書監李至進新校御書太宗謂至曰嗜好不可不謹不必遠驗前古祇如近世符彥卿棄任節鎮以射獵馳逐爲樂由是近習窺測其意競以鷹犬爲獻彥卿悅可兩人而假借之其下因恣橫侵擾故知人君當淡然無欲不使嗜好形見於外則奸邪無自入焉朕年長無他欲但喜讀書用監古今成敗爾至拜舞稱賀。

臣從彥釋曰太宗語李至曰人君當淡然無欲不使嗜好形見於外則奸邪無自入焉可謂善矣夫嗜好者人情之所不能免也方其淡然不使形見於外則其違道不遠也於是時也苟有皋夔稷契之徒以道詔之當視六經猶筌蹄上與堯舜相得於忘言之地矣至雖時之賢者聞帝喜讀書用監古今成敗之語拜舞稱賀謂爲將順可也然於稷契皋夔之徒則非其倫也。

太宗嘗語宰相曰朕比觀書見楚文王得茹黃之狗苑路之增畋於雲夢三月不返保申諫之王引席伏地申束箭五十跪加王背者再因趨出請死王召而謝之殺狗折增務治國事并國三十九朕未嘗不三復其言深加歎賞自非君臣道合何以至此若君忽而不信雖有直臣將焉用之

臣從彥釋曰保申之能諫楚文王之能從其事見於劉向說苑然文有小異說苑言荆文王得如黃之狗箇籬之增畋於雲夢三月不返得舟之姬淫期年不聽朝保申諫曰先王卜以申爲保吉今王得如黃之狗箇籬之增畋於雲夢三月不返及得舟之姬淫期年不聽朝王之罪當笞王曰不穀免

於襁褓託於諸侯願變更無筈保申曰臣承先王之命不敢廢王不受笞是廢先王之命臣寧得罪於王也乃席王王伏保申束箭五十跪加王背如此者再謂王起矣趨出欲自流乃請罪王曰此不穀之過保實何罪於是殺狗折矟逐舟之姬務治乎荆兼國三十九至漢興之初蕭何王陵聞之曰人君能奉先世之業而以成功名者其惟荆文王乎故天下譽之至今明王孝子忠臣以爲法保申之事有之與無臣不敢與知也戰國之時容或有之亦必先王顧託之臣與夫慈良之君不忘先世艱難克私從義者乃可行矣太宗提出言之取其大意非特施於一己與子孫也且以示天下後世使知人君納諫之美有至於此也

太宗嘗召御史中丞王化基至便殿侍坐甚久屬盛暑令搢笏揮扇問以邊事化基曰治天下猶植木焉所患者根本未固耳根本固則枝葉不足憂今朝廷既治則邊郡何患不安契丹部屬有求內附者太宗語侍臣曰國家若無外憂必有內患僅無內患必有外憂脫句特邊事耳皆可豫防奸邪無狀若爲內患深可懼也帝王用心須當謹此

唐置拾遺補闕掌供奉諷諫是時日奉內朝常親旒扆故凡事得以微辭諷諫唐季權臣專政阻絕諫官不得侍從太宗孜孜求諫渴聞忠言因改拾遺補闕爲正言司諫使專掌奏議左司諫知制誥王禹偁嘗上言請羣官候見宰相朝罷於政事堂同時接見其樞密使候都堂請見並不得於本廳接見賓客以防請託詔從之右正言直史館謝泌言以爲如此是疑大臣以私也古人有言

曰。疑則勿用。用則勿疑。今天下至廣。萬幾至繁。陛下聰明寄於輔臣。苟非接見羣官。何以盡知中外事。若令都堂羣臣。請見咨事。無解衣之暇。夫左右大臣。使非其人。當斥而去之。既得其人。任之以政。又何疑耶。今請不得本廳接見賓客。以防請託。非陛下推赤心待大臣之意。太宗覽奏嘉歎之。卽追還前詔。令宰相樞密使接見賓客如故。仍以泌所上書送史館。

太宗嘗修正殿頗施采繪。謝泌因對陳其事。卽日命代以丹堊。深加稱獎。賜金紫。拜左司諫。泌曰。陛下從諫如流。故臣得以竭誠。唐末有孟昌圖者。朝上諫疏。暮不知所在。詩人鄭谷爲詩以憫之前代如此。安得不亂。帝爲動容久之。

太宗嘗謂宰相曰。朕思君臣之間。要在上下情通。卽事無凝滯。若稍閒隔。豈能盡其道。宋琪曰。易卦乾在上。坤在下。謂之否。此天氣不下降。地氣不上騰之謂也。坤在上。乾在下。謂之泰。此天地交泰之象也。故凡君臣之道。必在情通。乃能成天下之務。帝曰。自古帝王。未有不任用賢良。致宗社延永。皆是自己昧於知人。不能分別善惡。爲奸邪蔽惑。以致顛覆。琪曰。前古治亂。皆由帝王。若帝王聖明。臣下得以宣力。奸邪之輩。自然屏迹。

太宗嘗謂呂蒙正等曰。凡爲君作一惡事。簡策所載。萬祀不滅。使後人觀之。以爲鑒戒。故堯舜爲善。而衆美歸之。桀紂爲不善。而衆惡萃之。可不謹耶。大凡有國有家者。未有不欲進君子退小人。然而君子少。而小人多何也。蒙正曰。時有盛衰。苟邦國隆盛。則君子道長。及乎將衰。則小人在位。俟其爲惡彰敗。則

政亦有損。古人云。小人害正。信不虛語。賢人若遇暗主。晦迹丘園。畏小人之用事耳。有國有家者。尤在辨察小人。不可不早。帝深然之。

淳化四年。開封府雍丘縣尉武程上疏。願減後宮嬪嬌。太宗謂宰相曰。武程疏遠小臣。不知宮闈中事。內庭給事不過三百人。皆有所掌。不可去者。卿等顧朕之視妻子如脫屣耳。所恨未能離世絕俗。追蹤羨門矣。必不學秦皇漢武作離宮別館。取良家子女以充其中。爲萬世譏議。卿固合知之。李昉曰。臣等家人。朔望朝禁中。備見宮闈簡儉之事。武程疏賤。妄陳狂瞽。宜加黜削以懲之。帝曰。朕曷嘗以言罪人。但念其不知耳。終不加罪。

臣從彥辨微曰。太宗時。內庭給事。不過三百人。皆有所掌。不可去也。武程疏遠小人。妄陳狂瞽。帝不罪之。以來天下之忠言。可謂善矣。然語宰相曰。卿等顧朕之視妻子如脫屣耳。所恨未能離世絕俗。追蹤羨門。則是過高者之言也。夫王化之本。關雎之訓是也。有關雎之德。必有麟趾之應。此周之所以致太平者也。若羨門等語。超然有塵外意。恐後世好高者聞而說之。則其失必有自矣。非人倫之美也。

至道元年三月。太宗召三司孔目吏李溥等。對於崇政殿。問以計司錢穀之務。溥等言盡知其利病。然不可以口占。願條對許之。俾中使押送中書。限五日悉令條奏。及上。帝謂宰相曰。李溥等令陳所見。亦頗各有所長。朕嘗謂陳恕曰。若文章稽古。此輩固不可望士人。至於錢穀利病。此輩自幼枕藉寢處其中。

必能周知根本。卿但假以顏色。引令剖陳。豈無資益。恕等剛強。終不肯降意。諮問宰相呂端對曰。耕當問奴。織當問婢。

臣從彥辨微曰。君之所貴乎道者三。籩豆之事。則有司存。太宗召李溥等。問以計司錢穀之務。使陳恕假之顏色。引令剖陳。恕等終不肯降意。下問未必非也。呂端以耕當問奴。織當問婢言之。蓋失之矣。

太宗嘗曰。清淨致理。黃老之深旨也。汲黯臥理淮陽。宓子賤彈琴治單父。蓋得其旨者也。朕當力行之。呂端曰。行黃老之道。以致昇平。其效甚速。呂蒙正曰。老子曰。治大國若烹小鮮。夫魚撓之則亂。比來上封事求更制度者甚衆。願陛下行清淨之化。

臣從彥辨微曰。道術不明久矣。漢興有蓋公者。治黃老。曹參師之。其言曰。治道貴清淨而民自定是也。然其相漢也。不過遵何之法。勿失而已矣。非聖人之誠也。聖人之誠。感無不通。故所過者化。所存者神。其感人也。不見聲色。而其應之也。捷於影響。此堯舜孔子之道也。宓子賤之爲單父也。鳴琴不下堂。而單父大治。任人故也。端與蒙正知有黃老。而不知有聖人。得之於彼。而失之於此。可勝惜哉。太宗嘗曰。人君致理之本。莫先簡易。老子古之聖人也。立言垂訓。朕所景慕。經云。天地不仁。以萬物爲芻狗。聖人不仁。以百姓爲芻狗。是知覆轡之德。含容光大。本無情於仁愛。非責望於品類也。

臣從彥辨微曰。易簡之理天理也。而世知之者鮮矣。行其所無事。不亦易乎。君子篤恭而天下平。不

亦簡乎易曰易則易知簡則易從易簡而天下之理得矣此之謂也老氏芻狗之說取其無情而已以聖人之神化言之則不見其誠以萬物化生言之則不見其感世有爲黃老之說者豈其因循前人偶未之思故耳夫鼓萬物不與聖人同憂者天之道也聖人則未免有憂矣若使百姓與萬物等而一以芻狗視之則亦何憂之有故老氏之學大者失之則詆訾堯舜不屑世務其下流爲申韓者有之矣此不可不辨也

太宗嘗謂近臣曰以智治國固不可也然緩急用之無不克矣又曰五常之於人惟智不可常用若禦戎制勝臨機應變舉爲權略可也固非朝廷爲理之道也老氏之戒正在於此

臣從彥辨微曰孟子曰仁之實事親是也義之實從兄是也智之實知斯二者弗去是也夫立人之道曰仁與義仁體也義用也行而宜之之謂也所謂智者知此二者而已及其行之也若禹治水然行其所無事而已矣堯舜之治天下不出乎此自周道衰洙泗之教未作而世所謂智者不然機變之巧雜然四出故鳥亂於上魚亂於下人亂於中此老氏之所以戒也非公天下者之言也

太宗嘗謂宰相曰朕於浮屠氏之教微語宗旨凡爲君治人卻是修行之地行一好事天下獲利此所謂利他者是也若梁武帝之所爲真大惑耳書之史冊爲後世笑趙普曰陛下以堯舜之道治世以浮屠之教修心聖智高遠洞悟真理非臣下所及

臣從彥辨微曰佛氏之學端有悟入處其言近理其道宏博世儒所不能窺太宗之言是已然絕乎

人倫外乎世務非堯舜孔子之道也夫治己治人其究一也堯曰咨爾舜天之歷數在爾躬允執其中四海困窮天祿永終舜亦以命禹所謂中者果何物也耶故堯舜之世垂拱無爲而天下大治若趙普者乃析而二之蓋不知言者也

太宗時有隱者陳搏善修養賜號希夷先生帝頗與之聯和謂宰相宋琪等曰陳搏獨善其身不干勢利真方外之士且言天下治安故來朝覲此意亦可念也遣中使送至中書琪等問曰先生得元默修養之道可以授人乎曰搏迹遁山野無用於世鍊養之事皆所不知亦未嘗習鍊吐納化形之術無可傳授假如白日昇天何益於治聖上龍顏秀異有天人之表洞達古今治亂之機真有道之主是君臣合德以治天下之時勤行修鍊無以加此琪等表上其言上覽奏甚喜未幾放還山

臣從彥辨微曰唐明皇時有吳筠頗似有道術者帝嘗問神仙治鍊法對曰此野人事非人主宜留意其所開陳皆名教世務天子重之搏對宋琪等語該於治體終不以其術市恩以誤朝廷其吳筠之徒歟然聖人盡道以其身所行率天下蓋欲天下皆至於聖人佛仙之學不然是二之也故君子不貴也

羅豫章先生文集卷之三

遼堯錄三

真宗

真宗咸平中。帝以邊兵未息。手札付宰相樞密陳禦邊之計。李沆等或請以鎮定高陽三路之兵會而爲一。以當衝要。或請三路各令防扞。或以鎮定兵陳於定州之北。又移高陽兵於寧邊軍。別設奇兵於順安軍。發丁壯備城彌縫其闕。帝總覽而裁定之。他日對便殿。內出陣圖諭之曰。今賊勢未息。尤用防備。屯兵雖多。須擇精銳。先據要害以制之。凡鎮定高陽三路兵。並會定州夾河爲大陣。量蕃寇遠近。出軍立柵。賊來堅守。勿追以伺便宜。大陣則騎卒居中。步卒環之。短兵接戰。勿離隊伍。務在持重。然後分遣魏能、白守素、張銳領騎六千。屯威敵軍楊延昭、張延禧、李懷岳領騎五千。屯保州田敏、楊凝、石延福領騎五千。屯北平寨。以當賊鋒。始至勿與鬪。待其氣衰。據城誘戰。使其奔命不暇。若南越保州與大軍遇。則令威敵之師與延昭會。使腹背皆受其敵。乘便掩殺。若不攻定州。縱軼南侵。則復會北平。田敏合勢入北界。邀其輜重。令雄霸破敵以來。互爲應援。又命孫全照、王德鈞、裴自榮領兵八千。屯寧邊軍。李重貴、趙守倫、張繼晏領兵五千。屯邢州。扼東西路。寇敵將遁。則令定州大軍與三路騎兵會擊。又命石普、盧文壽、王守俊領兵二萬。屯莫州。俟敵騎北去。則西趨順安襲擊。斷其西山之路。如河冰已合。賊由東

路則命劉用、劉漢凝、田思明領兵五千會石普、孫全照、犄角攻之。自餘重兵悉屯天雄。命石保吉鎮之。以張軍勢。朕雖經畫如此。以付將帥。尙恐有所未便。卿等審觀可否。更同商議。沆曰。戰陣之事。古今所難。且敵勢猖獗。非陛下制勝於內。諸將奉稟成筭。分禦邊要。實未易驅攘。今睿略裁制。盡合機宜。固非臣等愚慮所及。明年北戎大寇邊。捍禦之兵悉用此制。及駕幸澶淵。王師射殺賊將撻覽。王超大軍將會於駕前。楊延昭等諸將又各握勍兵。扼其歸路。敵人勢屈。遂乞通和。

臣從彥釋曰。真宗咸平中。命宰相樞密陳禦敵之計。帝總覽而裁定之。他日對便殿。內出陣圖諭之。曰。朕雖經畫如此。以付諸將。尙恐有所未便。卿等審觀可否。更同商議。而李沆等以爲盡合機宜。此於制勝一時之策。可謂善矣。然非常行之道也。自古朝廷之事。可付之相。邊事付之將。苟自中制之。立爲陣圖以授之。內外不相及。必有失機會者矣。古人云。閫外之事。將軍主之。此最爲知言也。

景德初。詔益楊延昭兵萬人。屯靜戎軍東。又令石普屯馬村西。以護屯田。扼黑盧口。萬年橋。敵騎奔衝之路。如北敵入寇。則會諸路兵。犄角追襲。仍令魏能、張凝、田敏以奇兵牽制之。時王超爲都總管。詔聽楊延昭等皆隸屬之。防遏北敵之勢。在此數處而已。

真宗自北道用兵。有邊奏至。凡軍旅之事。多先送中書。謂畢士安、寇準曰。此皆欲卿等先知。中書總文武大政。樞密雖專軍機。然大事須本中書頃來。李沆往往別具機宜上奏。卿等當詳閱之。但於討論者。悉言利害。勿以事干樞密而有隱也。

契丹請和。真宗以河北諸州易置牧守。召近臣對資政殿。御筆書李允則等十二人示之。曰朕酌今庶官能否以邊城遠近要害分命治之。庶保寧靜。卿等當更詳議。畢士安曰陛下所擇皆才適於用。望付外施行從之。

雄州團練使何承矩移齊州。以西上閭門使。河北安撫副使李允則知雄州。兼河北安撫使。承矩以老病求解邊事。帝令自擇其代表。薦允則。遂命之。

真宗嘗謂馬知節曰。知卿久在邊防。卿言禦戎之術。何者爲善。知節曰。邊防之地。橫亘雖長。據其要害。以扼其來路。惟順安軍至西山。不過二百里。若列陣於此。多設應兵。使其久莫能進。待其疲弊。時以奇兵輕騎。逼而擾之。彼將顛覆不暇。今之將帥。喜用騎兵。以多爲勝。臣謂善用騎兵者。不以多爲貴。但能設伏。觀寇敵之多少。度地形之險易。寇少則邀而擊之。衆則聚而攻之。常依城邑爲旋師之所。無不捷矣。真宗卽位。首下詔書求治。謂近臣曰。朕樂聞朝政闕失。以儆朕心。然臣寮章奏。多以增添事務。苛細爲利。亦有自陳勞績者。多是過行鞭朴。以取幹辦。殊不知國家從簡易之理也。國家政事自有大體。使其不嚴而理。不肅而成。豈可慘刻虐下。邀爲己功。使之臨民。徒傷和氣。

咸平元年正月。彗星出營室。二月。帝謂宰相曰。朕卽位以來。罔敢怠逸。庶陟治道。至於和平。今彗出甚異。其祥安在。呂端等言。變在齊魯之分。帝曰。朕以天下爲憂。豈直一方耶。乃下詔令有位極言無隱。自今避正殿。減常膳。

是年張齊賢、李沆入相。帝諭之曰：「忠孝之誠，終始如一，當同心協力以濟王事。」齊賢曰：「古者君臣一體，君爲元首，臣爲股肱，豈有不同心德能濟國家政事者哉？」帝曰：「國家之事務在公共審謹而後行之，則無失矣。況先帝所行之事，各著規程，但與卿等遵守而已。」

真宗嘗謂侍臣曰：「朕觀士大夫中或有名而無實者，何言行之相違也？」呂端曰：「君子之道，闡然而章，歷試經久，方見爲臣之節。」帝然之。

臣從彥釋曰：「君子之所爲，皆理之所必然。世之所常行者，然不可以求近功，圖近利。非如世間小有才者，一旦得君暴露其器能，以釣一時之譽。彼其設施，當亦有可觀者。要之，非能致遠者也。」呂端之言，其幾於道者歟。

真宗謂宰相曰：「朕於庶官中求其才幹者，尙多有之。若以德行，則罕見其人。夫德行之門，必有忠孝，未有德不足而忠孝能全者也。」

真宗嘗謂宰相曰：「臣寮中有被謗言，達朕聽者，咨之於衆，似得其實。然爲臣爲子，鮮有無過之人，但能改過知非，卽爲善也。況朝廷不以一眚廢人，終身之用乎？」

真宗嘗閱兩省班簿，謂王旦等曰：「近侍之列，各有所長。然求文武適用，可委方面者，亦鮮。每念唐賢比肩而出，何當時得人之多也！」旦曰：「方今下位，豈無才俊？或恐拔擢未至，然觀前古進賢樂善者甚重。故人不求備，亦不以小疵累大德。是以人得足用，今立朝之士，誰則無過？陛下無不保庇，然流言稍多，終亦

梗於任使。鑒其愛憎。惟託聖明。則庶無棄人矣。

景德元年內出京朝官二十四人。付閣門召對崇政殿。在外者乘傳代歸。真宗采於朝論。皆以廉幹稱者。及對或試其詞業。或觀其言論。多實於臺閣館殿遷秩任之。真宗擇官判大理寺。謂宰相曰。法官尤宜謹選。若官不稱職。或有冤濫。水旱災沴自此而興。因問幾品以上可當是任。李沆曰。執法之任不必限官高卑。但有執守不回邪者。可當此任。帝然之。待制張知白。求判國子監。真宗顧謂王旦曰。國庠無事。知白豈倦於處劇耶。旦曰。知白知書雖乏利刃而涉道近雅。諳練民政。未嘗以身謀形。言似介而清者。帝曰。執憲之官久未得人。知白守道若此。可充是選。乃命以諫議大夫權御史中丞。

真宗嘗以楊徽之。夏侯嶠。充翰林侍讀學士。邢昺。呂文仲。充翰林侍講侍講。更直侍讀長。上設直廬於祕閣。日給上食珍膳。夜則迭宿。命中使劉崇超日具當宿官名於內東門進入。自是多召對諮訪。或至中夜。

景德元年。邢州地震。真宗問宰相。知州爲誰。或以上官正對。帝曰。郡國災沴。民不寧居。尤在牧守。以道鎮靜。則封疆無事。正累典藩郡。以知兵自許。但未知其能以鎮靜欽恤爲意否。天下之廣。未免焦勞。正爲此爾。

諸王府侍講孫奭言。牧民之官。不可用有勢援者。帝曰。朝廷用人。惟問才與不才耳。豈得限以世家。如其

敗官自有常典。雖勢援何害。

帝與宰相議擇官。王旦曰：「天下重地，爲朝廷屏翰者，不過一二十州。若皆得人，則振撫一方，威惠兼著。」帝深然之。

真宗嘗語李至等曰：「凡所舉官，多聞謬濫。不若先擇舉主，以類求人。今外官切要，惟轉輸之任。卿等可先擇人，俾令舉之。因言外郡長吏奏舉管內職官，慮有受其請託者。宜依條約，又州縣闕員甚多，當選有清望朝官各舉所知，庶得良吏用，親吾民。」

祥符二年，帝謂近臣曰：「臣寮付外任，有升殿者，朕皆諭以所行之事，期於振舉。若不升殿者，今當各以其事爲誠勵詞，摹印賜之。仍御製七條以賜文臣：一曰清心，二曰奉公，三曰修德，四曰責實，五曰明察，六曰勸諭，七曰革弊。俾刻石圖壁，奉以爲法。」

咸平三年，詔天下凡所解舉人，不得獨考藝能，先須察訪行實，卽許薦送。

八年，新及第進士授官入謝。帝顧謂宰相曰：「其中才不才，未可盡知。」王旦曰：「十得二三，亦爲多矣。然遭逢盛時，享此科級，或才行兼備，便爲亨塗。」帝曰：「大都立身當官，以持重爲本，戒於輕率也。」

帝性好文，雖以文辭取士，然必視其器識。每御崇政殿賜進士及第，必召其高第三四人並列於庭，更察其形神磊落者，始賜第一，或取其文辭有理趣。

終南山隱士种放，居東明峯，專以講習爲業。太宗時嘗一召之，以母老不至。咸平元年，母卒，貧不能葬。帝

賜錢帛等物。令葬其母。詔曰：將使天下聞之。知其厚逸民旌孝子。相勸而歸於善也。五年。帝召放賜對便殿。命坐與語久之。喜謂宰相曰：放召對與語不山野。訪以民事。則曰徐而化之間。邊事久不對。但言愛民而已。夫賞一逸人。可以勸天下之靜退者。乃授左司諫。直昭文館。

真宗初卽位。詔訪文宣王後。得四十五代孫延世。命爲曲阜令。召戒之曰：汝宜精心典領祖廟。無使墮壞。

仍賜祭器經書金帛以遣之。

祥符元年。真宗幸曲阜。謁文宣王廟。有司定儀止肅揖。帝特展拜。以表嚴師崇儒之意。又幸孔林。以古木擁道。降輿乘馬。詣墓拜奠。帝曰：唐明皇褒先聖爲王。朕欲追謚爲帝可乎？當令有司檢討故事以聞。或云文宣周之陪臣。周止稱王。不當加以帝號。遂止增美名。又議加封十哲爵以公。七十二賢以侯。王旦曰：顏子舊封堯公。今並列公爵。則亞聖之名無以別異。望封顏子堯國公。餘爲郡公。帝然之。

臣從彥釋曰：唐時詔郡邑通得祀社稷孔子。獨孔子用王者事。以門人爲配。自天子以下北面拜跪薦祭。不敢少忽者。非以其爲萬代之法故耶？行之未幾。而淺於學者智不及此。乃請東揖以殺太重。歷朝循而不改。逮及我宋。章聖皇帝之幸曲阜也。奮獨見之明。特展拜以表嚴師崇儒之意。德之盛者也。若章聖皇帝可謂知所本矣。古者帝王稱號。因時而已。非德有優劣也。唐明皇旣追封先聖爲王。襲其舊號可也。加之以帝號。而褒崇之亦可也。顧時君所欲如何耳。夫禮惟其稱而已矣。而或者不諭。乃以周之陪臣爲言。豈知禮也哉。

真宗初卽位。詔內外文武羣臣。自今人君有過時政或虧。軍事減否。民閒利病。並許直言極諫。抗疏以聞。苟言之弗用。則過在朕躬。若求之不言。則罪將誰執。

田錫好諫。真宗最重之。常謂李沆宰相曰。如此諫官亦甚難得。朝政少有闕失。方在思慮。而錫疏已至矣。朕每覽其章奏。必特與語獎激之。錫常慮奏疏不得速達。朕令季具所上事目及月日以聞。

咸平六年。真宗詔田錫對便殿。錫曰。臣願陛下廣稽古之道。爲治民之要。舊有御屏風。及御覽。但記分門事類。不若取四部中治亂興亡之事。可以銘於座右。爲帝王鑒戒者。錄之以資聖覽。是以皇王之道。致陛下於堯舜也。帝曰。善。卿可纂錄進來。俄命兼侍御史知雜宰相言。錫性本清介。臨事不甚敏悟。帝曰。朕覽其章奏。有諫臣之風。當試用之。

真宗自卽位。旣旦御前殿。中書樞密院三司。開封尹。審刑院。及請對官。以次奏事。至辰後還宮。進食少時。復御便殿視事。或閱軍事。講習武藝。多至巳午間夜。則召侍讀學士。諮詢政事。或至中夜還宮。

咸平六年。真宗幸金明池。語宰相曰。士民游樂熙熙然。甚慰朕心。非承平豐年。何以致此。李沆曰。陛下卽位以來。未嘗輒有科徭。官吏秉法。絕無煩擾。信太平之幸。帝曰。朕以天下之人。當務佚之。至於勞民興師。蓋不得已也。今西夏未下。尙煩捍禦。然歷觀載籍。自漢魏以至於唐。四海無事。固亦罕遇無事之際。更宜詳思備豫。則無患矣。

景德四年。帝謂近臣曰。使人自西北至者云。邊鄙無事。民人安居。曠土開墾。稼穡豐茂。關西物價甚賤。每

念二邊動煩經置當擇守臣不妄生事者。戢兵推信以保安靖。

祥符中帝又謂宰相曰朕自北鄙和好邊陲無事然居安慮危未嘗敢自暇逸每爲文置諸左右朝夕觀之庶以自警也。

咸平四年帝謂宰相曰軍國之事無巨細必與卿等議之朕未嘗耑斷卿等固亦無隱以副朕意祕書丞孫冕上言曰在京諸司每以上行事務詣便殿取裁況邊事煩劇聖慮焦勞務在依違互相蒙蔽縱其保位甚非稱職唐景龍中名臣姚廷均奏言律令格式陳之象魏奉而行之事無不理比見諸司官寮不能遵守事無巨細皆悉奏聞且爲君在乎任臣而臣在乎奉法萬幾之煩不可徧覽所以設官分職委任責成古帝王垂拱之化蓋在於此自今若軍國大事及條式無文者聽奏取旨餘據章旨合行者各令準法處分其別生凝滯故有稽遲望許御史奏劾帝曰冕之此奏頗知大體當下詔切戒之至祥符四年太常博士王嗣宗又言陛下躬親庶政十有五年小大之事一取宸斷自今望陛下除禮樂征伐大事之外其餘細務責成左右或者曰嗣宗不知朝廷事務帝曰此頗識大體當降詔獎之仍出勤政論以示羣臣宰相等請出示朝堂從之

臣從彥辨微曰孔子稱舜曰無爲而治者其舜也與恭己正南面而已矣夫舜之所以無爲者以百揆得其人九官任其職故也帝自咸平初以至祥符躬親庶政十有五年而在京諸司每以常行事務詣便殿取裁事無大小一決宸衷故孫冕王嗣宗等得以言之昔商中宗高宗之不敢荒寧文王

自朝至於日中昃不遑暇食周公舉以戒成王則昔之人非不貴勤也至周公作立政則曰文王惟克厥宅心乃克立茲常事又曰文王罔攸兼於庶言庶獄庶慎惟有司之牧夫曷嘗勞形弊智於事之末流哉唐杜黃裳對憲宗曰王者之道在修己任賢而已若乃簿書訟獄百吏能否非人主所自任故王者擇人而任之責其成功見功必賞有罪必罰誰敢不盡力李唐君臣不足道也然黃裳之言猶能及此況興唐虞之治乎帝旣以冕奏頗知大體又降詔以獎諭嗣宗可謂能聽言矣而宰相乃請以勤政論出示朝堂孔子所謂將順者豈其然耶

咸平五年將議親郊鹽鐵使王嗣宗奏言郊祀煩費望行謁廟之禮而推慶賜呂蒙正曰前代停郊謁廟蓋因災沴今無故罷禋祀典禮無據真宗曰不惟典禮無據郊壇一日之費所省幾何殊非寅恭事天之意也因詔三司非禋祀所須並可減省

臣從彥辨微曰古者歲一郊牲用繭栗器用陶匏無甚煩費取其恭誠而已今三歲一有事焉已非古典若賞賜士卒乃太祖一時之命後因以爲例議者猶欲不給新兵以漸去之而兩府以下皆賜金帛何也王嗣宗知財用數目而已固不足與議禮蒙正名臣也謂前代停郊謁廟蓋因災沴今無之費事天之禮不可闕也若士卒賞賜可革革之兩府以下金帛可削削之一主於恭誠孰曰不可神宗時河北災傷兩府以下乞不賜金帛而司馬光以爲救災節用宜自貴近始王安石乃引常亮

辭賜饌事以難之非知言者也

景德四年內侍史崇貴使嘉州還言平羌知縣氏昭度廉幹健爲知縣王固貪濁真宗曰內臣將命乃能察善惡固亦可獎然其密侍宮禁便爾賞罰外人未爲厭伏當須轉運使審察之

臣從彥辨微曰察州縣官吏善惡自有常典又時遣專使辨其能否罷輒苛刻以聞而褒黜之足以爲治矣崇貴使嘉州以其職分言之通傳詔命而已其還也曰某人廉幹某人貪濁則非其分非分而言於理在所懲不然勿問可也用其言而使轉運使審察之是猶徇之也古之人拔本塞源其智慮深矣可不戒哉可不念哉

楊億在學士院真宗忽夜召見於一小閣深在禁中旣見賜茶從容者久之因出文橐數篋以示億云卿識朕書蹟乎皆朕自起草未嘗命臣下代作也億惶恐不知所對頓首再拜而出由是佯狂奔於陽翟是時億文章擅天下然性剛特而寡合故惡之者得以事譖之帝性好文初待億眷顧無比晚年恩禮漸衰亦由此也

臣從彥辨微曰楊億文章擅天下真宗使處翰林則是億有文章而帝有億也孔子曰天何言哉四時行焉百物生焉以億之才藝其處翰林之日非不久也不能納其君以文章融於性與天道使閒言得行何所歸咎耶

景德五年正月三日天書降於左承天門帝召羣臣對崇政殿西序諭其事王旦曰陛下以至誠事天地

以仁孝事宗恭己愛人夙夜求治是以干戈偃戢年穀屢豐臣等嘗謂天道不遠必有昭報今者神授祕文實彰上穹佑德之應然茲事簡冊所無又未審所諭之事啓封之際當屏左右不欲顯示於衆也帝曰天若譴示闕政固與卿等祇畏改悔若告誠朕躬亦當克己自修豈宜隱之使人不知乎遂啓其書讀之帝曰朕德微薄何乃天降明命昭灼若此旦曰昔龍圖授義龜書錫禹非常之應惟聖主得之陛下應天立極振古稱首上帝所以申錫祕檢示治國大中之道此萬世一時也改元大中祥符

臣從彥辨微曰昔堯舜重黎絕地通天罔有降格恐人神雜揉故也使天書之降果真有之蓋已非堯舜之治矣以理考之穹然默運於無形之中而四時行焉百物生焉此天之理也天豈諄諄然有物以命之乎遠求前古未之或聞下驗庶民無所取信而王旦乃以龍圖授義龜書錫禹比之使帝之精誠一寓於非所寓可勝惜哉

祥符元年四月天書降禁中齋閣造昭應宮兗州父老僧道呂良等詣闕請封禪帝命宣諭之曰封禪大禮歷代罕有難遂爾等所請良等進曰國家受命五十餘年功成治定已致太平天降祥符以顯盛德固宜告成岱岳以報天地是時朝臣亦有請者及知兗州邵曄亦率官屬奉表請從之

臣從彥辨微曰封禪非古也其秦漢之侈心乎善乎王通之言也古者祭天有封禪者有之矣謂其理起於黃帝曰黃帝封泰山禪梁父則失之矣以唐韓愈之賢猶溺於習俗又況其下者乎本朝太平興國中百官三請封泰山而迫於供頓之不暇祥符之初兗州父老詣闕陳請遂踵行之此亦當

時用事者之過也。夫堯舜三代之君所以稱太平頌成功者皆載在詩書。詩書所無有則亦無所考證。故不以堯舜三代之君爲法者皆妄作也。

羅豫章先生文集卷之四

遵堯錄四

仁宗

仁宗爲皇太子時，賓客李迪等常侍燕東宮。見帝容止端莊，雖優戲在前，亦不甚顧。他日因奏事言之，真宗曰：「平時居內中亦未嘗妄言笑也。」

帝旣監國，大臣會議必秉笏南面而立，聽其議論。謂輔臣曰：「但盡公道則善矣。」

天聖七年，玉清昭應宮災。帝以守衛者不謹所致，詔付御史臺推勘，皆欲戮之。御史中丞王曉上疏曰：「昔魯僖三宮災，孔子以爲僖等親盡當毀。漢遼東高廟災及高園便殿災，董仲舒曰：『高廟不當居陵旁。』故天災今玉清之興，不合經義。先帝信方士邪巧之說，蠹耗財用無紀。今天焚之，乃戒其侈而不經也。願思有以上應天變，帝感悟，遂薄守衛者罪。」

仁宗嘗觀國史，見章聖東封西祀及修玉清、昭應、景靈、土木之役，極天下之巧，過爲奢侈。謂輔臣曰：「此雖爲太平盛事，然亦過度。當時執政大臣及修造者，不得不任其責。宰相呂夷簡曰：『府庫一空，至今不充實。』職此之由。」帝曰：「如此之事，朕當戒之。」

真宗時，撰皇帝霸論，又撰良臣忠臣論等。仁宗嘗觀之，因謂大臣曰：「凡爲臣當爲良臣忠臣，無爲奸臣。」

權臣宰相等奏曰願陛下行皇王之道而不行霸道臣等待罪宰相敢不奉聖訓

臣從彥釋曰孟子曰以力假仁者霸霸必有大國以德行仁者王王不待大又曰霸者之民驩虞如也王者之民皞皞如也善乎孟子之言昔孔子沒孟子繼之惟孟子爲知霸王者也夫學至於顏孟則王道其幾之矣故知聖人之學者然後可與語王道不知聖人之學不可與語也不知聖人之學驟而語之曰此霸道也此王道也必惑而不信矣聖人不作自炎漢以來有可稱者莫不雜以霸道漢宣之言是也若唐貞觀中海內康寧帝曰此魏徵勸我行仁義之效也蓋亦假之者也神宗時以司馬光之學猶誤爲之說又況其下者乎然則霸王之道須要胸中灼然當時宰相未必能知也

仁宗嘗謂輔臣曰朕自臨御以來命參知政事多矣其間忠純可紀者蔡齊魯宗道薛奎而已宰相王曾張知白皆履行忠謹雖時有小失而終無大過李迪亦忠樸自守第言多輕發耳宰相龐籍等對曰才難自古而然帝復曰朕於諸臣記其大不記其小皆近世之名臣也

慶歷三年宰相呂夷簡有疾帝憂之使內侍勞問不絕聞其未愈歎曰古人云毚可療疾信必有之因翦毚以賜夷簡曰以此爲藥庶幾有瘳又使疏可以大用者數人久之猶不能朝許乘馬至殿門命內侍取杌子輿以前夷簡不敢當帝命二府卽其家議政事

至和中陳執中罷相而用文彥博富弼二人久有人望一旦復用朝士往往相賀歐陽修時爲學士後數日奏事垂拱帝問新除彥博等外議如何修以朝士相賀爲對帝喜曰古人用人或以夢卜苟

不知人當從人望。於是修作彥博批答云。永惟商周之所紀。至以夢卜而求賢。孰若搢紳之公言。從中外之人望。蓋述上語也。

明道中。宰相欲除親舊二人爲正言司諫。帝謂祖宗法制。臺諫官須自宸選。今不可壞弛祖宗法度。臺諫自大臣除。則大臣過失無敢言者。執政等恐懼稱死罪。流汗浹背。再拜下陛。

太子中舍同正員王文度。摹勒真宗御書。賜紫服。且求佩魚。帝謂輔臣曰。先帝嘗命伎術官毋得佩魚。所以別士類也。宜申明之。其後文度又乞換正官出職。帝曰。伎術人若除正官。則漸亂流品矣。如舊制遷同正官而已。

李淑爲翰林學士。其父若谷爲樞密直學士。淑請班父下。帝曰。父子同朝。宜有以異之。遂從其請。

孔延魯爲右正言。法當遷官。願不遷。而爲其父尚書祠部郎中致仕。勉求紫章服。帝曰。子爲父請可從也。特賜勉紫袍章服。宰相等曰。延魯所陳。足以厚風俗。陛下曲從其請。實資孝治。

仁宗嘗謂張士遜曰。帝王之明。在於擇人。辨邪正。則天下無不治矣。士遜曰。惟帝其難之。若選用得才。又使邪正分。則二帝三王不易此道也。

仁宗嘗謂近臣曰。人臣雖以才適於用。要當以德行爲本。苟懷不正。挾僞以自蔽。用心雖巧。而形迹益彰。朕以此觀人。洞見邪正。宰相等對曰。孔子第其門人。而顏回以德行爲首。陛下所言。知人之要。盡於此矣。

仁宗嘗謂輔臣曰。比來臣寮請對。其欲進者多矣。求退者少何也。王曾曰。士人貪廉。繫時之用舍。惟朝廷抑奔競。崇靜退。則庶幾有難進之風。帝然之。

諫官韓絳嘗因對而言曰。天子之柄不可下移。事當間出睿斷。帝曰。朕固不憚自有處分。所慮未中於理。而有司奉行。則其害已加於人。故每欲先盡大臣之心而行之。

仁宗嘗謂輔臣曰。知州通判。民之表也。今審官院一以名次用人可乎。宰相王曾曰。不次用人。誠足以勸羣吏。然須更爲選任之法。乃可遵行。帝然之。

仁宗嘗謂輔臣曰。朕觀古者求治之世。牧民之吏多稱其官。而百姓得安其業。今求治之路。非不廣也。而吏多失職。未稱所以爲民之意。豈今人才之少。而世變之殊哉。殆不得久於其官故也。蓋智能才力之士。雖有興利除害。禁姦勸善之意。非稍假以歲月。則其利民亦且媿而不爲之用。欲終厥功。其路無繇。今夫州縣特以爲治者。守令也。察其能者。使得久於其官。而褒賞以勸之。今所謂先務者。無以過此。遂詔今後守令。有清白不擾。而政績殊異。有惠於民者。本路安撫。轉運使副。判官。提點刑獄司。同置保舉再任。中書別加察訪。審如所舉。即與推恩。

仁宗退朝。嘗命侍臣講讀於邇英閣。賈昌朝時爲侍講。講春秋傳。每至諸侯淫亂事。則略而不說。帝問其故。昌朝以實對。帝曰。六經載此。所以爲後世鑒戒。何必諱也。

臣從彥釋曰。愚聞之師曰。春秋之書。百王不易之通法也。自周道衰。聖人虛後世聖王不作。而大道

遂墜也。故作此一書。若語顏淵爲邦之間是也。此書乃文質之中。寬猛之宜。是非之公也。而後世之爲春秋者。特三傳耳。彼昌朝略而不說者。果經意耶。抑左氏之僻耶。

真宗嘗覽前代經史。摭其可以爲後世法者。著正說五十篇。帝於經筵。命侍臣日讀一篇。及侍讀丁度等講春秋。讀正說中篇。帝謂曰。春秋所述。皆前世治亂。敢不鑒戒。正說先帝訓言。敢不遵奉。度曰。陛下德音若此。誠天下之幸。

帝每御經筵。以象架皮書策外嚮。以便侍臣講讀。

仁宗嘗賜及第進士王堯臣等。聞喜宴於瓊林苑。遣內侍賜以御詩。又各人賜中庸書一軸。自後遂以爲常。初帝將以中庸賜進士。命輔臣錄本旣上。使宰相張知白讀之。至修身治人之道。必命反復陳之。帝傾聽終篇始罷。

臣從彥釋曰。中庸之書。孔子傳之曾子。曾子傳之子思。子思述所授之言。以著於篇中者。天下之大本。庸者。天下之定理。故以名篇。此聖學之淵源。六經之奧旨也。漢唐之間。讀之者非無其人。然而知其味者鮮矣。自仁祖發之。以其書賜及第進士王堯臣等。厥今遂有知之者。昔者堯舜相授。不越乎此。而天下大治。天其或者無乃有意斯文。將以啓悟天下後世故耶。

皇佑中。宗室叔韶獻所爲文。召試學士院。文中等賜進士及第。遷右領軍衛將軍。入謝。命坐賜茶。帝謂曰。宗室好學無幾。爾獨能以文章進士及第。前此無有也。朕欲使天下之人。知宗室中亦有賢者。爾勉之。

無忘舊學

天聖初仁宗薦享景靈宮太廟及祀圓丘大禮使王曾言皇帝袞冕執圭酌獻廟則七室每室奏樂章圓丘之樂則六變陟降者再恐難立俟請節之帝不可曰三年一饗朕不敢憚勞也

皇佑二年大饗明堂帝每遇神主行禮畢卽鞠躬卻行須盡褥位始改步移向贊導從升者皆約其數令侍臣偏諭獻官及進徹俎豆者悉安徐謹嚴毋恩遽失恭質明而禮畢方他時行禮加數刻之緩云

仁宗嘗謂輔臣曰今公卿之家專殖產業未聞有立廟者豈朝廷勸戒有所未至耶將風教陵遲訖不可復耶當考諸古制議其可施於今者行之宰相等曰陛下慶歷初郊祀赦書嘗許羣臣立家廟矣有司不能推廣上恩因循顧望遂踰十載王公薦享下同閭巷衣冠昭穆雜用家人緣偷襲弊恬不爲怪睿心至意形於歎息臣實愧之夫子親廟序昭穆別貴賤之等所以爲孝雖有過差是過於爲孝矣殖產營利或與民爭利反不以爲恥逮夫立廟則曰不敢是敢於爭利而不敢於爲孝也於是下兩制與禮官參議惜夫有君無臣久之終不克定

仁宗一夕旣寢聞樂聲命燭興坐使內侍審之曰礮樓百姓飲酒樂聲也帝欣然曰朕爲天下父母得百姓長如此足矣聽徹乃就寢乎

仁宗愛民恤物出於聖性其於斷獄必求以生嘗謂輔臣曰朕未嘗置人以死況敢濫刑罰乎至和初京師大疫帝出犀二株付太醫合藥以療民解之則其一通天犀也內侍李舜舉馳奏曰此犀之美者請以爲御所服帶帝曰朕以爲帶曷若以療民疾乎命立碎之

仁宗愛惜民力其於宮室池臺尤謹興作三司嘗欲以玉清昭應宮故地爲御苑帝曰吾奉先帝苑囿猶以爲廣何用此以資游觀之侈哉

景祐四年司天上言明年正旦日食此所謂三朝之始人君尤忌之請移閏月以避之帝以問大臣參知政事程琳曰日者衆陽之長人君之象如有食恐陛下乾剛之道有所虧而致惟修德可以免之帝曰卿言極是不如自責以答天變

慶歷六年帝謂輔臣曰比臣僚有言星變者且國家雖無天異亦當自修警況因譴見者乎夫天之譴告人君使懼而修德亦由人主知臣下之過失示以戒勅使得自新則不陷於咎惡此天心之仁也敢不祇畏奉承之

壽州長史林獻可上書論國家休咎之事帝謂輔臣曰朝廷政事得失在於任人得賢則治否則亂若堯舜之世雖有災異不爲害桀紂之世雖有祥瑞不爲福今小人多託虛名以爲直規求進取不可不察也

知無爲軍茹孝標嘗獻芝草二百五十本帝曰朕每以豐年爲瑞賢臣爲寶至於草木蟲魚之異豈足尙

哉孝標特放罪仍戒天下自今毋得以此聞。

天聖七年契丹大饑流民過界河監司以聞帝謂輔臣曰彼雖境外之民皆朕赤子也盍多方賑救之乃詔契丹流民所過人給米二升分送唐鄧襄汝四州以閒田處之。

慶歷中仁宗謂輔臣曰自元昊請和西兵解嚴然敵人之心不保其往深慮邊臣浸失爲備可詔陝西河東經略司及北京夏竦密戒所部遠爲斥堠廣蓄廩糧訓練士卒繕葺城池如對嚴敵焉庶無倉卒之患。

天聖初監修國史王曾言唐史官吳競於正史實錄外采太宗與羣臣問對之語爲貞觀政要今欲采太祖太宗真宗實錄日歷時政記起居注擇簡易事迹不入正史者命史官別爲一書與正史並行帝從之詔呂夷簡專其事書成今所謂三朝寶訓是也。

慶歷三年樞密副使富弼言臣歷觀古帝王理天下未有不以法制爲首務法制立然後萬事有經而治道可濟也宋有天下八十餘年太祖始革五代之弊創立制度太宗克紹前烈紀綱益明真宗承兩朝太平之基謹守成憲近年紀綱頗紊隨事變更兩府執政便爲成例施行於天下咸以爲非而朝廷安然奉行不思剗革至使民力殫竭國用空匱吏員冗而政道缺賞罰無準邊敵外侵寇盜充斥如此百端不可悉數其所以然者蓋法制不立淪胥以至於此也臣今欲選官置局將三朝典故及尋討久來諸司所行可用文字分門類聚編成一書置在兩府俾爲規範庶幾元綱稍振弊法漸除此守基圖救

禍亂之根本也。帝嘉其奏，命歐陽修等四人同共編修詔勅總領之，分別事類。凡若干門，於逐事之後，各釋其意之相類者，止釋一事，書成今所謂太平故事是也。

臣從彥釋曰：仁宗承平之久，紀綱不振，蓋因循積習之弊耳。然能爲太平天子四十二年，民到於今稱之以德，意存焉故也。況德意既孚於民，而紀綱又明，則其遺後代宜如何耶？此勅之所以奮然欲追祖宗思割革也。

章聖皇帝之未有上也，嘗遣內侍往泰山茅仙禱祈。內侍遇異人言：王真人已降生爲宋第四帝耳。內侍問王真人者何人，異人曰：古之燧人氏是也。時章懿皇后亦夢羽衣數百人從一仙官自空而下，謂曰：此託生於夫人，覺而奏其事。真宗甚說。及帝生，火光屬天，佳氣滿室。帝方五六歲，常持槐木片以筭鑽之。真宗問曰：何用？曰：試鑽火爾。真宗謂后妃曰：所謂燧人氏信不虛爾。

臣從彥辨微曰：二氣五行交運，雖剛柔雜揉，善惡不齊，然聖人之生必得其氣之純粹而不偏者，此理之常也。自古帝王下至庶人無子，祈禱而得者有之矣，皆出於至誠之所感，感必有應，此亦理之常也。夫事無徵不信，不信民弗從。若內侍之遇異人，章懿皇后之夢，所謂無證者也。無證而言，啓詐妄之道，君子不取也。或曰：高宗夢得說載在商書。古人不以爲非，何耶？曰：高宗賢君也。傳說賢臣也。以至誠之君，思得賢臣，故夢賚良弼，理亦有之。此亦感通之理也。今其言曰：皇帝夢羽衣數百人從一仙官自空而下。曰：此託生於夫人，則非理矣。非知道者孰能知之。

仁宗初選郭氏爲皇后甚有姿色然剛妒無子又嘗與向美人爭殿帝以爲不可母天下廢爲庶人右司諫范仲淹諫曰后者所以長陰教而母萬國不宜以過失輕廢立且人孰無過陛下當諭后失置之別館擇嬪妃老者勸道之俟其悔而復宮書奏不納明日又率其屬伏閣論列帝遣中人押送中書商量宰相以漢唐有廢后故事仲淹曰上天委堯舜相公奈何以前世弊法累盛德御史中丞孔道輔又極論其不可明日留班與宰相廷辨是非仲淹等得罪后遂廢居瑤華宮

臣從彥辨微曰古者天子立六官三公九卿二十七大夫八十一元士以聽天下之外治天子后立六宮三夫人九嬪二十七世婦八十一御妻以聽天下之內治故曰天子聽男教后聽女順天子理陽道后治陰德終身不變者也禮有七出爲大夫以下者言之天子無廢后之文諸侯無廢夫人之事是以關雎樂得淑女以配君子憂在進賢不淫其色采擇之法在審其初而已所以防色慾窒讒間杜僭亂治亂禍福之機在於此矣仁宗時郭后以無子願避后位入道理之所不可者也故仲淹等爭之至伏閣論列當時執政之人不知以堯舜待其君乃引其君使蹈漢唐弊法可勝惜哉

郭后廢之明年章獻明肅皇后服未除而宰相等勸帝復娶曹后范仲淹進曰又教陛下做一不好事他日宰相語韓琦曰此事外人不知劉旣上仙官家春秋盛郭后向美人皆以失寵廢以色進者不可勝數不立后無以止之

臣從彥辨微曰男女之配終身不變者也故禮天子諸侯不再娶說者謂天子諸侯內職具備后夫

人亡可以攝治故無再娶之禮唐啖氏亦曰古者諸侯一娶九女元妃卒則次妃攝行內事無再娶之文故春秋之法仲子不得爲夫人由是言之則天子可知矣明道中郭后入道宰相等勸帝復娶曹后其累盛德蓋不特章獻服未除也後之爲人君者可不戒哉可不戒哉

景祐中太平日久仕進之人皆依託權要以希進用奔競成風又臺官言事瑣碎不根治體多挾仇怨以害良士一日帝謂宰相曰古者卿大夫相與避於朝士庶人相與避於道下至漢文之時恥言人過今士人交誣浸成黨與乃下詔戒敕之詔既下邪柔者頗愧焉

臣從彥辨微曰孟子曰仁言不如仁聲之入人深也仁言仁聲有以異乎曰仁言爲政者道其所爲仁聲民所稱道此不可不知也夫天子所爲要須有以風動天下如漢光武起循吏卓茂而以太傅處之魏以毛玠爲尙書唐以楊綰爲宰相是也區區命令非所以感人也彼漢唐之君何足道哉然一時之間所爲合理尙足以感動況以堯舜之道革易天下者乎

慶歷三年帝以晏殊爲相范仲淹爲參知政事杜衍爲樞密使韓琦與富弼副之以至臺閣多一時之賢天子旣厭西兵閔天下困弊奮然有意遂欲因羣才以更治數詔大臣條天下事方施行十未及一而小人權幸者皆不便明年秋會殊以事罷而仲淹等相次亦皆去事遂已

臣從彥辨微曰小人之權幸可畏也久矣以仁宗之英明急於圖治晏殊爲相羣賢在朝天下拭目以望太平而富范等各條具其事以時所宜先者方施行之歐陽修又以天子更張政事憂憫元元

而勞心求治之意載於制書以諷曉訓敕在位者可謂一時之良而衄於讒間不果其志何耶古者人君立政立事君臣相與合心同謀明足以照之仁足以守之勇足以斷之爲之不暴而持之以久故小人不得以措其私權幸不得以搖其成若慶歷之事銳之於始而不究其終君臣之間毋乃有未至耶致治之難古今之通患也可勝咤哉

誕節太祖曰長春太宗曰壽寧真宗曰承天仁宗曰乾元英宗曰壽聖神宗曰同天哲宗曰興龍

臣從彥辨微曰誕節古無有也自唐開元中源乾曜等啓之耳說者謂唐太宗不以生日宴樂以爲父母劬勞之日也乾曜等乃以人主生日爲節夫節者陰陽氣至之候不可爲也明皇享國日久侈心漸生致臣下以逸欲導之耳乃立誕節虛名宴樂蓋欲誇示四海非所以垂訓後世也我朝太祖以下諸君踵而行之各立誕節之名亦獨何哉

羅豫章先生文集卷之五

遵堯錄五

李沆

太宗時以著作佐郎直史館，賜五品服。雍熙中，左拾遺王化基上書，大言自薦。帝謂宰相曰：「李沆、宋湜皆佳士也，可並試之。」明日並命爲右補闕、知制誥。沆位二人之次，特升於上。未幾召入翰林充學士，賜金紫。弼違獻可，多沃上心。天子知其才，乃有意於大用。淳化二年，拜給事中、參知政事。帝乃循名責實，沆勵翼一心，將明庶政。名器有倫，人無僥倖。四年以本官罷去。

真宗卽位，拜戶部侍郎、參知政事。明年以本官平章事。沆在中書，未嘗密進封章。帝諮其故，沆曰：「臣備位宰相，公當公言之。苟背同列，密有啓奏，非讒卽佞。臣每嫉此，豈復自爲之耶？」帝嗟賞之。

將詔庶官上封直言，有指中書過失，請行罷免者。帝覽之不悅，謂沆曰：「此輩皆非良善，止欲自進，當譴責以儆之。」沆曰：「朝庭比開言路，苟言之當理，宜加旌賞。不則留中可也。況臣等非才，備員台輔，儻蒙見黜，乃是言事之臣有補朝庭。」帝曰：「卿真長者耳。」

臣從彥釋曰：自古諫官論事，執政者多忌之，又惡聞過失，杜塞天下之口。惟唐之裴垍與李沆二人不然，垍之相憲宗也，諫官有論事者，必獎激之，使盡言。而章聖時，有指中書過失者，帝欲責之。沆曰：

朝庭比開言路，顧言之當理與否耳。歸咎於己而自謂非才，非忠於事君以天下國家爲一體者，其孰能之。

咸平五年春，帝以上元御樓見人物煩盛，因命舉酒賜侍臣曰：「天下富庶如此。」嘉興卿等共舉此觴。沆辭避至數四，訖不受。帝爲之變色。翼日王旦謁之，遂巡語及力辭酒事。沆曰：「天下庶事尙多有未濟者，人主豈得言治安。」遂極論治體，以爲自古人主好尙之弊有三：不好色則好兵，不好兵則好神仙，以臣觀之，聖性如此，必無好色好兵之累。第恐異日爲方士所惑。沆老矣，思念相公適當之耳。

景德初，北敵寇邊，沆當居守之任，坐鎮京國，令行禁止，不戮一人，使天下無南顧之憂。同德一心，光輔大政。明年進門下侍郎。王旦前此已任參知政事，及是西北二方猶梗，羽書邊奏無虛日。每延英盡訪王命急宣，或至旰昃，不遑暇食。旦謂沆曰：「安得企見太平，吾輩當優游燕息矣。」沆曰：「國家強敵外患，適足爲警懼。異日天下燕安，人臣率職亦未必高拱無事，君奚念哉。」

臣從彥釋曰：常人之情，方當有警時，不能隨事應酬，或至失措，及太平多暇，則怠忘而不知變生無形。沆以國家強敵外患，適足爲警懼。異日天下晏安，未必無事，則其所見過於常人遠矣。

沆內行修謹，識大體，外居大位，接賓客，常寡言。馬亮與沆同年生，又與其弟維善，因以語維，維乘間達亮語。沆曰：「吾非不知也。然今之朝士，得升殿言事，上封論奏，了無壅蔽，多下有司，皆見之矣。若邦國大計，北有強敵，西有巨寇，日旰條議，所以備禦之策，非不詳究，搢紳中若李宗愕、趙安仁，皆時之英秀，與之

談論猶不能啓發言意。自餘通籍之子，坐起拜揖，尙周章失措。卽帝必自論功，以希寵獎，此有何可採？而與之接語耶？苟屈意與相親，則世所謂籠罩籠罩之事，僕病未能也。爲我謝馬君。沆常言居重位，實無補萬分。惟中外所陳利害，一切報罷，此少足以報國耳。朝廷防制，纖悉備具，或徇所陳請，施行一事，卽所傷多矣。議者謂此正唐人陸象先庸人擾之之論也。

臣從彥釋曰：李沆之言，以常人觀之，甚得太平宰相之體。必不至若張湯輩，取祖宗法度，紛紛更張，以擾天下之民。然太宗好論錢穀，呂端、寇準等不能言，而張觀能之。真宗崇信天書，王旦等不能言，而張奭能之。尺有所短，寸有所長，豈可厚誣？以天下皆無人，堯曰稽於衆，舍己從人，又況其下者乎？此則沆之失也。

沆之相也，是時丁謂尙爲兩制。寇準屢薦之，未及進用。準一日言於沆曰：「如丁謂之才，搢紳無幾。相公不用何也？」沆曰：「丁今已爲兩禁，稍進用則當國矣。若此人者，果可使當國乎？」準曰：「然。相公自度終能抑之乎？」沆曰：「唯。唯行且用之。他日願勿悔也。」及謂秉政，未幾而準有南遷之禍。

初，沆當無事時，常與王旦說及方士之說，及西北二方有警，又曰：「異日天下宴安，人臣率職，亦未必高拱無事。其後北鄙和好，西人款附，不十年間，西祀東封，旦講禮儀，治財賦，力不暇給。追憶其言，使人卽其家，圖像拜之，服其先識。」

寇準

太宗時以通判鄆州召見。帝謂曰：「知卿有謀，試與朕決一事。」令中外不驚擾。此事已與大臣議之矣。準請云某事。帝曰：「東宮所爲不法，他日必爲桀紂之行。欲廢之，則宮中已有兵甲，恐召亂。」準曰：「請某月日令東宮於某處攝行禮。其左右侍衛皆令從之。陛下搜其宮中，果有不法之器，俟還而示之。隔下左右勿令入。但一黃門力爾。」帝以爲然。東宮服事遂廢之。

太宗久不豫。時準在魏駟召還，問以後事。準謝曰：「知子莫若父。臣愚不敢與也。」帝曰：「以卿明智不阿順，故以問卿。卿不應辭避。」準再拜請曰：「臣觀諸皇子，誠無不令。至如壽王，得人心深矣。」帝大悅，遂定策以壽王爲太子。躬行告廟。及還，六宮皆登御樓以觀之。時李后在焉，聞百姓皆歌呼曰：「吾帝之子，年少可愛。」后不悅，歸以告帝。帝召準責曰：「萬姓但知有太子，而不知朕。卿悞朕也。」準曰：「太子萬世祀社稷之主。若傳之失人，誠爲可憂。今天下歌其得賢，臣敢以爲賀。」帝始解。自是眷注益厚。累爲諫議大夫、樞密副使、參知政事。

真宗卽位，併三司爲一使。始命準爲之。景德元年，同平章事會契丹寇澶淵。時大臣議宜戒嚴，京城益兵，圖西南之幸，準面折之曰：「王欽若江南人，故請陛下幸金陵；陳堯叟蜀人，故請陛下幸成都。皆淺議耳，不足取也。今寇涉吾地，莫敢前卻。陛下若親征，賊當膽裂。惡在他圖哉？」帝至澶淵，賊猶未退。準曰：「六軍心膽在陛下身上。若今登城，擒賊必矣。」帝從之。將吏懼呼萬弩齊發，射殺賊將王統軍者，軍聲大振。賊勢蹙，遂乞通和。帝以問準，準畫策進曰：「如能用臣此策，可保數百年無事。不然四五十年後，恐賊心又

生矣。帝曰：朕不忍生靈受困，不如聽其和。蓋五十年後安知無能捍塞者乎。北人得和，準在軍中。詔令有所不從，及事平，謝曰：使臣盡用詔令，豈得事成之速哉？帝笑而勞之曰：卿顧爲誰？初，帝幸澶淵，乘輿方渡河北，騎充斥，至於城下。人情諮詢，帝使人微覘準所爲，而準方酣寢於中書，鼻息如雷，人以其一時鎮物，比之謝安。

臣從彥釋曰：人才各有所用，自非大賢不可責備。若準多私意強辨，誠可惡。至契丹寇澶淵，折陳堯叟、王欽若、乖謬之謀，勸帝親征，赫然立大功於世，蓋非庸庸者所能及也。非才各有用故耶？

準好賢樂善，於知人尤明。事所推薦，若种放、孫何、丁謂等之徒，皆出其門。嘗語其親厚者曰：「丁生誠奇才，然不堪重任。」其後自永興軍復拜中書侍郎平章事。是時丁謂爲佐。一日會食政事堂，羹汙準鬢，謂起與拂之。準曰：「君爲參預大臣，而親爲官長拂鬢者乎？」謂顧左右大愧恨之。帝旣倦政，而丁謂奸佞迎合，太后有臨朝之謀，準便殿請對曰：「太子睿德天縱，足以任天下之事。陛下胡不協天人之係，望講社稷之不謀？若丁謂負才而挾奸，曹利用恃權而使氣，皆不可以輔少主，恐亂陛下家事。因俯伏流涕。帝命中人扶起慰謝之。明日謂之黨以急變聞，飛不軌之語以中準。坐是罷相。乾興元年二月，貶雷州司戶參軍。

臣從彥釋曰：古之用人，以德器爲先。才大而德不足，祇爲累耳。準始薦丁謂於李沆，沆不可。準曰：「若丁謂之才，相公自度終能抑之乎？」及謂當國，又不能容之，斥其挾奸，不可以輔少主，遂取南遷之禍。

準之南遷可也。然使謂無所忌憚。得結雷允恭以圖不軌。皆準之由。後之爲大臣者。貪人之才。而不究其德。可不戒哉。

初真宗問兩府曰。朕欲得一人爲馬步軍都指揮使。卿等擇之。方議其事。吏有以文籍進者。準曰。爲何文字。曰例簿也。準叱之曰。朝廷欲用一衛官。尚須檢例。則安用我輩哉。夫壞國政。損王道。正由中書屑屑檢例耳。準在中書。凡有爲多不用舊例。皆此類也。然三入相。而不能久於位者。或以此爲累。

帝方不豫。謂侍臣曰。能成吾子爲帝。而不朕虞者。惟寇準、李迪可矣。

王旦

真宗時。槩爲翰林學士。人謂有宰相器。嘗奏事下殿。帝目送之曰。與朕致太平者。必斯人也。

景德二年。拜平章事。時契丹初請盟。趙德明納誓約。願守河西。二邊兵罷不用。帝遂欲以無事治天下。旦以謂宋興三世。祖宗之法具在。故其爲相。務行故事。謹所改作。進退能否。賞罰必當。羣工百司。各得其職。

趙德明納誓約。願守河西。已而以民飢爲言。求糧百萬斛。大臣皆言。德明新納誓。而敢違。乞以詔書責之。帝以問旦。旦曰。不可。請降詔書諭之。曰。爾土災饉。朝廷撫御遠方。固當賑救。然邊塞芻粟屯戍者衆。自要支持。今敕旨有司。具粟百萬於京師。可自遣衆飛輓。帝大喜。德明得詔。慚且拜曰。朝廷有人矣。遂止。時契丹征高麗。帝語旦曰。萬一高麗窮蹙。或歸於我。或來乞師。何以處之。旦曰。當顧其大者。契丹方固盟。

好高麗貢奉。案歲不至。帝曰然可諭登州。如高麗使來乞師。卽語案年貢奉不入。不敢達於朝廷。如有歸款存撫之。亦不須以聞。

帝一日問宰相曰。方今四海無虞。而言事者。謂和好之利。不若克定之功也。旦曰。祖宗平一區宇。每興功勳。衆皆非獲已。先帝時頗已厭兵。今柔服異域。守在四裔。蓋帝王之盛德也。且武夫悍卒。小有成功。過求爵賞。威望既盛。卽須姑息。往往不能自保功名。輕議兵戎。不可不察也。

臣從彥釋曰。師旅之興。必有謂也。在易師之六五曰。田有禽利執言。無咎。蓋謂外裔猾夏。寇賊奸宄。以害生民。不可懷來也。然後奉辭以討之。猶之禽獸在田。侵害苗稼。然後獵之。如此而動。乃得無咎。不然。則其咎大矣。執言奉辭也。蓋明其罪而討之也。書有甘誓。費誓。詩有采薇采芑。亦以此也。後世失之。乃有和好克定之說。至漢武帝時。韓安國、王恢爭辨紛紛。不足尙古者。天子有道。守在四裔。詩曰。莫敢不來享。莫敢不來王。是也。及其爲中國患也。則亦驅之出境而已。詩曰。薄伐玁狁。至於太原。是也。爲害則獵而取之。不卹也。易之言是也。此聖人之格言。萬世不易之理也。王旦之對章聖皇帝也。善則善矣。然其理未明。其事無證。謂武夫悍卒。小有成功。過求爵賞。不能自保功名。是亦利之而已矣。豈知言哉。

祥符八年。帝謂旦等曰。人言中書罕言事。稀接賓客。政事亦多稽留。旦曰。中書當言者。惟進賢退不肖。四方邊事。郡縣水旱。官吏能否。刑法枉直。此數事動稟進止。外人不知。是臣等無漏言也。稀接賓客。誠亦

有之如轉運使副提點刑獄切要藩郡知州及非常委任者臣等未嘗見其有攜牘至中書者多是徵求恩渥大約中書事簡加以勤守程式不敢隨意增損循常細務應報或有緩急亦無踰日限此外思慮不至事有未便未免重煩聖斷耳帝再三慰諭之

旦嘗因便坐奏事帝語及一省郎姓名旦曰斯人履行才幹俱有可采今方典郡宜與甄擢旦等皆素知其爲人因其稱薦之自是屢加歎賞令俟歸朝擢以爲轉運使徐更別議陞陟旣而代還會外計闕官旦卽與同列擬定名氏約以次日奏補及晚其人投刺來謁旦以方議委任辭弗見詰朝入對具道本末請授以轉漕帝默然不許退而歎駭者久之乃知昨暮造請雖弗見已爲同察者所糾矣每戒同列以私謁之嫌當須謹避庶幾免於悔吝

臣從彥釋曰人主於宰相疑則勿任任則勿疑昔謝泌言之詳矣旦以外計闕官除一轉運使且大臣所嘗共薦者帝用同察者之言而不聽非至誠委任大道也夫君臣一體者也爲旦計者苟情行不通當力言之以除壅蔽可也奈何以私謁之嫌欲自免於悔吝天下之事有大於一轉運使者多矣每每如此則其爲悔吝可勝言哉此旦之失也

初旦在中書帝獨倚任見有議事帝必曰曾與王旦議否事無大小非其言不決自景德以來襲一聖休德之後謹守成憲務在安靜外無寇敵之患者十餘年兵革不用議者謂得太平宰相之體
旦於用人不以名譽必求其實苟賢且才矣必久其官衆以爲宜某職然後遷其所薦引人未嘗知寇準

爲樞密使當罷使人求使相。旦大驚曰：「將相之任豈可求耶？」旦素不受私請，準深恨之。已而制出除武勝軍節度使同中書門下平章事。入見泣曰：「非陛下知臣，何以至此？」帝具道旦所以薦者，準始愧歎以爲不可及。

旦任事久，有於上前謗之者，輒引咎未嘗自辨。至他人有過失，可辨者辨之，必得而後已。榮王宮火延前殿，有言非天災，請置獄劾火事，當坐死者百餘人。旦獨請見曰：「始失火時，陛下以罪己詔天下，而臣等皆上章待罪。今反歸咎於人，何以示信？」且火雖有迹，庸知非天譴耶？由是坐者皆免。

旦常以任中正知成都，代張詠言者以爲不可。帝以問旦，旦曰：「非中正不能守詠之成規。若他人往，必妄有變更矣。」帝然之。言者亦服。旦之能用人也。

宦者劉成珪，以恭謹得幸。病且死，求爲節度使。帝以語旦曰：「承珪待此以瞑目。」旦執以爲不可，曰：「他日將有求爲樞密使者，奈何？」至今內臣官不過留後。

王曾

真宗景德中，授著作佐郎、直史館。時朝廷與契丹修好，遣詔使以北朝稱之。曾抗疏論列，當稱契丹，不當稱北朝。帝尤加賞激，朝論歸之。然使者已行，遂已。累遷諫議大夫、參知政事。

帝好神仙，築昭應景靈宮，用大臣領使，以曾爲景靈宮使，不拜。忤旨罷政，出知南京。曾之罷也，日往候故太尉王旦，屬旦疾，因辭弗見。旣而語之曰：「王君介然，他日勳業德望甚大，顧某不得見之耳。」且曰：「王君

昨以辭避景靈宮使拂帝意然進退詳雅詞直氣和了無所懼某自循省在政府幾二十年每進對稍忤卽蹙縮不自容以是知其器度矣

天禧二年召爲平章事初真宗不豫者久之莊憲太后方有臨朝之望仁宗居儲邸於資善堂決事物議籍籍咸有所去就會曾再貳鉤席語錢惟演曰皇儲冲幼非中宮不可獨立中宮非倚皇儲之重則人心不附矣惟演以劉氏之姻畱入白之兩宮由是益親遂無閒言

臣從彥釋曰周成王嗣位之初攝政者周公而已炎漢以來乃有太后臨朝之事而後世襲其例遂以兩宮稱之或曰二聖皆非治世典禮也天禧中物議籍籍咸有所去就蓋母后聽從小人之利此安危禍福之機也而世常蹈之何耶若曾之言蓋亦救其末而已

乾興二年以章聖遺制皇太后權處分軍國事聽斷儀式久未定丁謂每欲議大政則皇太后坐後殿朝執政朔望則皇帝坐前殿朝羣臣其餘庶務獨令入內押班雷允恭禁中附奏傳命中書樞密院平決之衆議以爲不可上下隔絕中外惴恐曾時判禮儀院乃采蔡邕獨斷所述東漢故事皇帝在左母后在右同殿垂簾坐中書樞密院以次奏事如儀議既定人心乃安

景祐元年拜樞密使遷右僕射門下平章事曾始參大政屬太尉王旦當國每進用朝士必先望實或告之曰某人才某人賢則曰誠知此人然歷官尙淺人望未著且俾養望歲久不渝而後擢任則榮塗坦然中外允協曾嘗誌之及執政之日遵行其言人皆心服

臣從彥釋曰古之士者自十五入學至四十而後仕其意若曰善道以久而後立人材以久而後成故處之以燕閒之地而寬之以歲月之期俾專其業俟其志一定則其仕也不遷於利不屈於欲道之於民而民從動之於民而民和天下被其澤矣後世恆於科舉自童稚間已有汲汲趨利之意一旦臨民則亦何所不至也王旦章聖時在中書最久每進用朝士必先望實苟人望未孚則雖告之曰某人才某人賢不驟進也此真救弊之良圖也曾之當國也遵行其言人皆心服非已行之驗故耶

曾德器深厚而寡言當時有得其品題一兩句者莫不榮之是時韓琦爲諫官因納劄子曾忽云近日頻見章疏甚好只如此可矣向來如高若訥輩多是擇利范希文亦未免近名須要純意於國家事耳後琦果爲名臣

尹洙初入館編校四年欲得一差遣遂到中書援錢延年例曾徐曰學士自行何爲在錢延年等列耶洙終身以爲愧恨其畏之如此

曾當國時門下未嘗顯拔一人者范仲淹時爲司諫乘閒諷之曰明揚士類宰相之任也公之盛德少此耳曾徐應之曰恩若已出怨使誰當仲淹憫然自失退而歎曰真宰相也

臣從彥釋曰宰相之職在於進賢退不肖古之人有舉之至於同朝而人不以爲德有廢黜之終其身而人不以爲怨者合於至公故也故舉一賢使天下之人知如是者皆可勉去一不肖使天下之

人知如是者皆可懲無非教也夫以明揚士類爲宰相之任此諷言也曾答之曰恩若已出怨使誰當則是避嫌者也避嫌非至公之道也仲淹聞而歎之蓋亦得之於初而失之於末矣

曾嘗語人曰昔楊億有言人之操履無若誠實竊欽佩之苟執之不渝夷險可以一致及當國內外親戚

可任者言之於上否者厚卹之以金帛終不以名器私所親

羅豫章先生文集卷之六

遵堯錄六

杜衍

仁宗時以樞密直學士知永興軍。初夏人叛命天下苦於兵。自陝以西尤病。吏緣侵漁。調發督迫。民至破業不能足。往往自經投水以死。及衍至。語其人曰。吾不能免汝。然可使汝不勞爾。乃爲之區處計校。量物有無貴賤。道里遠近。寬其期會。使得次第輸送。由是物不踊貴。車牛芻秣宿食如平時。而吏束手無所施。民比他州費省十六七。

慶歷二年遷吏部侍郎。樞密使。吏部審官主天下吏員。而居職者類以不久遷去。故吏得爲姦。衍始視銓事。一日選者三人爭某闕。衍以問吏。吏受丙賄。對曰。當與甲。乙不能爭。乃授他闕。居數日。吏教丙訟甲負某事。不當得。衍悟。召乙問之。乙謝曰。業已得他闕。不願爭。衍不得已與丙。而笑曰。此非吏罪。乃吾未知銓法爾。因命諸曹各具格式科條以白。問曰。盡乎。曰。盡矣。明日敕諸吏無得升堂。使坐曹廳行文書而已。由是吏不得與銓事。予奪一出於己。居月餘。聲動京師。衍掌銓之明年。以本官同中書門下平章事。苞苴寶貨。不敢到其門。是時帝厭西兵之久出。而民弊甚。急用丞相富弼。樞密韓琦。及范仲淹。而三者。乃欲盡革衆事。以修紀綱。而小人權幸者。皆不悅。獨衍與相左右。

臣從彥釋曰昔唐明皇開元初盧懷慎與姚崇同秉政自以才不及崇每事推之但具位而已其後司馬光作資治通鑑深取之曰賢知用事爲同僚者專固以分其權媚嫉以毀其功是誠罪人崇唐之賢相懷慎與之同心戮力以濟明皇中興之治故崇則有應變救時之稱懷慎有坐鎮雅俗之譽當時以爲奇遇後世以爲美談不亦可嘉也哉我朝慶歷時杜衍位登樞府職典銓衡當韓琦富弼范仲淹三賢並用之日乃欲盡革弊政以修舉紀綱而權幸小人皆不悅獨衍與相左右略無爾我之嫌書曰同心同德傳曰其心休休焉其如有容焉嗚呼若衍殆庶幾矣亦豈讓於姚崇與懷慎者哉

仁宗自慶歷中力止內降之弊時有權幸干之者曰朕與內降不難然宰相衍公正介執必不出敕忽有不得已而降聖旨者衍皆收之俟及十數則連封而面還之帝嘗謂歐陽修曰外人知杜衍封還內降耶吾居禁中有求恩澤者每以杜衍不可告而止者多於所封還也其助我多矣初帝嘗謂杜衍曰朕宮中被宦官女子求恩澤不得已降旨者但止勿行衍降拜賀曰陛下爲宗廟社稷發此盛德之言天下幸甚臣敢不奉詔退坐中書召當直史官具道聖語使書之韓琦聞之曰杜公可謂能釘鉸上詔矣衍執政不久才百日輒罷去衍之罷相也以太子太保里居然聖眷不衰及將祀明堂帝謂文彥博曰朝廷耆老之在外者朕欲致之以相大禮因以示古人尊事黃者之意乃詔衍與太子少傅任布等二人陪祀衍以羸老不任就道具表謝以不得與觀盛禮爲恨帝復優詔勞之後王洙謁告歸南京入辭帝

曰杜衍在彼卿爲朕問其安否

韓琦嘗語人曰杜祁公存心至公而樂與人爲善旣知其人無復有毫髮疑閒者始某爲樞密副使而杜公爲太尉某輒論難一二事杜公不樂人或諷解之則曰某長渠三十歲耳尙有誤耶久之旣相亮卽每事問曰諫議看來未但曾經諫議看便將來押字某益爲之盡心不敢忽也以此見杜公存心至公不以必出於己爲勝賢於人遠矣

臣從彥釋曰世俗之人莫不喜人同乎己而惡人異於己也同於己而欲之異於己而不欲者以出乎衆爲心也以出乎衆爲心則以其不大故也惟大爲能有容善者共說之不善者共改之宜無彼己之異故舜曰大舜禹曰大禹者明乎此而已矣若衍存心至公而樂與人爲善不以必出於己爲勝其舜禹之徒與詩云維其有之是以似之此之謂也

衍爲人尤潔廉自剋其爲大臣事其上以不欺爲忠推於人以行己取信故其動靜纖悉謹而有法其立於朝廷天下國家以爲重其治吏事如其爲人其聽獄訟雖明敏而審覈愈精故屢決疑獄人以爲神其簿書出納推析毫髮終日無倦色至爲條目必使吏不得爲姦而已及其施於民則簡而易行居家見賓客必問時事聞有善喜若已出至有所不可憂見於色或夜不能寐如任其責者

韓琦

仁宗景祐中擢左司諫是時宰相王隨陳堯佐皆老病不和中書事多不決參政韓億石中立又頗以私

害公琦連疏其失久之不報又請下御史臺集百官決是非帝迫於正論於是同詔罷執政者四人琦旣攻退四執政朝議欲以知制誥寵其盡言琦曰諫行足矣因取美官非本意也人其謂何語聞遂寢臣從彥釋曰凡爲天下國家者安危治亂是非得失必有至當之論至正之理而宰相行之臺諫言之其總一也至於宰相或取充位則臺諫不可以無言臺諫或非其人則宰相不得以緘默趨於至當而已矣仁宗景祐中中書事多不決而參政二人又以私害公琦爲司諫連疏其失帝迫於正論遂罷執政者四人此其職也朝議欲以知制誥寵其盡言則非矣夫臺諫官正可以觀人其德量器識足以當大任者莫不皆見可則用之不可則去之奚屑屑然以知制誥寵之哉琦曰諫行足矣因取美官非本意琦之言則是也非有大器識者其孰能之

慶歷中以工部尚書同中書門下平章事仁宗方倚左右大臣以經太平之務琦自得選敕羣吏百司奉法循理各安其職而天下晏然是時范仲淹富弼與琦同在二府上前爭事議論不同然下殿來不失和氣如未嘗爭也議者謂琦等三人輔政正如推車子蓋其心皆主於車可行而已不爲己也仁宗在位四十一年皇嗣未立天下以爲憂大臣顧避畏縮莫敢言琦乘閒進曰皇嗣者天下安危之所係自昔禍亂之起由策不早定也今陛下春秋高未有建立何不擇宗室賢者而定之以爲宗廟社稷之計乎不聽他日又進言之乃以英廟判宗正寺琦旣得請許立嗣矣而宮人宦者環泣於內大臣小臣橫議於外帝意復動臨朝默默不樂琦每伺顏色不知身之所容也洎英廟讓避久之而帝意尤懈

乃曰不如且放下琦遂從容對曰天下人已知之而中輒非朝廷舉動也帝悟遂立爲皇子

英廟旣卽位之數日初挂服於柩前哀未發而暴疾作連聲大呼其語言人所不可曉左右皆反走大臣輩駭愕癡立莫知所措琦亟投杖於地直趨至前抱持入簾曰誰激惱官家且當服藥內人驚散呼之徐徐方來遂擁帝以授之曰須用心照管官家再三慰安以出因戒見者曰今日事惟某人見外人未有知者復位哭泣處之若無事時歐陽修歸以語所親曰韓公遇事真不可及

英宗之疾中外莫知其誠僞且遇內侍少恩禮左右不悅多道禁中隱慝者雖大臣亦惑顧未敢發口耳獨琦屹然不爲衆說動一日昌言曰豈有前殿不曾差了一語入宮門乃有許多錯耶自爾不敢妄有傳語言者

英廟旣驟自外來又方寢疾不預事人情傾向在太后琦慮宮中有不測者一日因對簾下曰臣等只在外面見得官家裏面保護全在太后若官家失照管太后亦未得安穩太后照管則衆人自當照管同列爲縮頸流汗旣出吳奎長文曰語不太過否琦曰不如此不得

琦在嘉祐治平閒當昭陵未復土英廟未親政中書文字日益於前一一從頭看看了卽處置了接人更久處事更多精神意思定而不亂靜而不煩如終日未嘗觸事者

神宗卽位拜司空兼侍中爲英廟山陵使卽還引故事固請罷遂以節鎮出訖熙寧八年凡兩判相州一判永興軍一鎮大名王安石用事嘗上疏極論新法又論青苗其言切至帝感悟欲罷其法安石稱疾

求去乃已之。

琦之爲諫官也。凡中外事。苟在所知。未嘗不言。其啓迪上心。則又每以明得失。正紀綱。親忠直。遠邪佞。爲急。其在相府也。事有當然。不當然者。必堅立不動。反復論列。須正而後退。不敢造次放過。每見人文字。有攻人隱惡者。卽手自封之。未嘗使人見。嘗自言作相極有難處事。蓋天下事無有盡如意者。須要包容。不然。不可一日處也。

歐陽修在政府時。有自陳其不中理者。輒峻折之。故人多怨。至琦爲相。從容諭以不可之理。同列有不相下者。語嘗至相擊。琦待其氣定。每爲平之。使歸於是。雖喜勝者亦自默也。

北都大內壁間。有太宗詩。意在燕薊。辭甚壯。琦之來也。得旨修護之。旣而客有勸以此詩進者。曰。修之則已。安用進爲客。亦莫諭其意。及韓絳來。遂摹本進。琦聞之歎曰。昔豈不知此耶。顧上方銳意西事。老臣不當更道之耳。

初富弼嘗薦王安石爲翰林學士。琦不聽。弼曰。若安石經術才行。乃不用耶。曰。安石經術才行。某所備知。此人豈可使長在人主左右。必生事也。已而果然。在相州時。雖老病不忘社稷。每聞安石更祖宗一法度。朝廷一紀綱。憂見於色。或至終日不食。

臣從彥釋曰。王安石以高明之學。卓絕之行。前無古人。其意蓋以孟子自待。自世俗觀之。可謂名世之士矣。故熙寧初。富弼屢薦。琦乃謂此人不可使長在人主左右。其後安石入翰林。每奏對黼座之

前惟事強辨及其大用也變更祖宗法度叛爲新說以取必天下之人茅靡其心而鑿其耳目流毒後世嗚呼異哉所爲貴於鑑明者爲其不可以形遁也所爲貴於衡平者爲其不可以輕重欺也觀李沆之於丁謂琦之於安石不啻鑑衡然不知二人獨何以見之如此其審此其可貴也已

范仲淹

仁宗天聖初擢右司諫當太后臨朝至日大會前殿帝將帥百官爲壽仲淹言天子無北面且開後世弱人主以強母后之漸其事遂已及太后崩有遺命立楊太妃代之仲淹曰太后聖母也自古無代立者由是罷其冊命是時大旱蝗奉使安撫東南還會郭后廢率諫官御史伏闕下爭不能得貶知睦州仲淹自睦州徙知蘇州歲餘以禮部員外郎天章閣待制召還論事益切執政者忌之命知開封府欲撓以繁劇而使他議之不暇也仲淹明敏決事如神事日益簡乃取古今治亂安危爲上開說時宰相得君權無與比或以己意任人人不敢言仲淹因對而言曰君當任人臣當任事若進用賢傑選擢近輔願出自聖意不宜專委宰相帝曰我不能盡記卿可作一文書來仲淹又爲百官圖以獻曰任人各以其材而百職修堯舜之治不過此也因指其遷進遲速次序曰如此而可以爲公可以爲私亦不可不察由是呂丞相怒至交論上前坐是落職知饒州司諫高若訥言貶黜猶輕歐陽修貽書責之亦得罪余靖尹洙皆以朋黨出黜於是蔡襄作四賢一不肖詩以播其事仲淹之知開封也嘗曰侍臣當輔翼天子之政教固宜朝夕論思以圖稱職如開封乃一郡之事耳政使如趙張輩功績何足爲報

臣從彥釋曰。帝王之興。尋常所謂才智藝能之士。足以效一官一職者。非無其人。於千官百辟中。求其最者。若兼善澤民。以天下爲心。不忘王室者。何其艱哉。仲淹以侍臣命知開封。謂趙張不足爲。惟以輔翼天子政教爲念。則其賢可知也已。傳曰。器博者無近用。道長者其功遠。仲淹有焉。

寶元中。趙元昊叛。帝以仲淹才兼文武。復職知永興道。授陝西都轉運使。遷龍圖閣直學士。時延安新被圍。朝廷擇將。皆畏不行。仲淹奏請兼延安事。以待寇至。帝嘉而從之。閱兵得萬八千。遣六將軍俾領之。日夕訓練。號爲精兵。賊聞之戒曰。無以延安爲意。今小范老子。腹中自有數萬甲兵。不比大范可欺。

慶歷三年春。召爲樞密副使。旣至數月。以爲參知政事。仲淹每進見。帝必以太平責之。仲淹歎曰。上之用我者至矣。然事有先後。而革弊於久安。非一朝可也。旣而再賜手詔。趣使條天下事。又開天章閣。召見賜坐。授以紙筆。使疏於前。仲淹惶恐避席。始退而條列。時所宜先者十餘事。其詔天下興學取士。先德行。不專文辭。革磨勘例。遷以別能否。減任子之數。而除濫官。用農桑考課守宰等事。方施行。而磨勘任子之法。僥倖之人。皆不便。因相與騰口。嫉仲淹者。亦幸外有言。喜爲之左右。會契丹與元昊爭銀甕族。於是麟府奏警。仲淹乃自請出爲河東陝西宣撫。二寇聞之。皆不敢動。

初晏殊。杜衍。皆居相府。而仲淹。富弼。韓琦。皆進用。以至臺閣。多一時之賢。太子中允石介。作慶歷聖德詩。以褒貶大臣。分別邪正。衆數百言。仲淹與韓琦適自陝西來。道中得之。仲淹撫股謂琦曰。爲此鬼怪輩壞了也。琦曰。天下事不可如此。如此必不成。

臣從彥釋曰易大有之象曰火在天上大有君子以遏惡揚善順天休命夫當大有之時善者揚惡者遏不使並進固君子所以順天休美之命也然忠佞大分善惡察察不知有包荒之義則小人權倖者將無所容而交結黨援何憚而不爲也仁宗時羣賢在朝石介作慶歷聖德詩以褒貶大臣失之於此此仲淹等之所以見忌而太平之功不成抑有由矣嗚乎仲淹可謂明也已

仲淹爲將務持重不急近功小利在延州時築青澗城墾營田復承平永平廢寨熟羌歸業者數萬戶在慶州時城大順以據要害奪賊地而耕之又城細腰胡盧於是明珠滅減等大族皆去賊爲中國用自邊制久墮至兵與將常不相識仲淹始分延州兵爲六將訓練齊整諸路皆用以爲法方元昊窺邊其主謀張元輩聞朝廷命將若韓琦等但嘻笑而已獨聞仲淹至則相顧有憂色

富弼

仁宗時以開封府推官擢知諫院康定元年日食正旦弼請罷宴撤樂外使在館亦宜就賜飲食而已執政不從及北人行之帝以爲悔初宰相惡聞忠言下令禁越職言事弼因論日食以謂應天變莫若通下情遂除其禁

臣從彥釋曰宰相以天下爲己任者也推公心由直道務使下情通以防壅蔽不亦善乎而惡聞忠言則其人可知已仁宗時執政者禁越職言事弼因論日食請除其禁此亦堯舜明四目達四聰之意而治亂之機也

自西方用兵以來吏民上書者甚衆初不省用弼言知制誥本中書屬官可選二人置局中書考其所言可用用之宰相以付學士弼曰此宰相偷安欲以天下盡付他人乞與廷辨又言邊事係國家安危不當專委樞密院周宰相魏仁浦兼樞密使國初范質王溥亦以宰相參知樞密院事今兵興宜使宰相以故事兼領帝曰軍國之事當盡歸中書樞密非古官然未欲遽變內降令中書同議樞密院事且書其檢宰相以內降納上前曰恐樞密院謂臣奪權弼曰此宰相避事耳非畏奪權也

慶歷三年兩除樞密副使弼言北人通好議者便謂無事邊備漸弛萬一敗盟臣死且有罪非獨臣不敢受亦願陛下思外裔輕侮中原之恥坐薪嘗膽不忘修政因以誥納上前逾月復除前命弼不得已乃受時晏殊爲相范仲淹爲參知政事杜衍爲樞密使韓琦與弼副之歐陽修余靖蔡襄爲諫官皆天下之望弼旣以社稷自任而帝獨責成弼與仲淹望太平於暮月之間數以手詔使條具其事又開天章閣召弼等坐且給筆札使書其所欲爲者遣中使二人更往督之且命仲淹主西事弼主北事弼與仲淹各上當世之務十餘條又自上河北安邊十三策大略以進賢退不肖止僥倖去宿病爲本殊漸易諸路監司之不才者使激汰所部吏於是小人始不悅矣小人既怨而大臣亦有以飛語譏之者帝雖不信弼因保州賊平求爲河北宣撫使以避之

至和中召拜中書門下平章事與文彥博並命宣制之日士大夫相慶於朝弼之爲相守格法行故事而附以公議故百官任職天下無事以所在民力困弊賦役不均遣使分道相視謂之寬卹民力又弛茶

禁以通商賈務省刑獄天下便之六年丁秦國夫人憂詔爲罷春宴故事執政遇喪皆起復弼以金革變禮不可用於平世仁宗五遣使起之卒不從命

仁宗熙寧中召拜左僕射平章事弼旣至未見有於上前言災異皆天數非人事得失所致者弼聞之歎曰人君所畏惟天若不畏天何事不可爲者去亂亡無幾矣是必奸臣欲進邪說故先導上以無所畏使輔拂諫諍之臣無所復施其力此治亂之機也卽上書數千言雜引春秋及古今傳記人情物理以明其決不然者時方苦旱羣臣請上尊號及作樂帝不許羣臣固請作樂弼言故事有災變皆徹樂恐上以同天節外使當上壽故未斷其請臣以爲此盛德事正當示外裔乞並罷上壽從之卽日而雨弼又上疏願益畏天戒遠奸佞近忠良帝親書詔答之曰敢不銘諸肺腑終老是戒弼旣上疏謝復申戒不已願陛下待羣臣不以同異爲喜怒不以喜怒爲用舍弼始見帝問邊事弼曰陛下卽位之初當布德行惠願二十年口不言兵因以九事爲戒

是年八月弼以疾辭位拜武寧軍節度使同中書門下平章事判河南改亳州時王安石用事行青苗弼以謂此法行則財聚於上民散於下且富民不願請願請皆貧民後不可復得故持之不行而提舉常平趙濟劾弼以大臣格法新法行當自貴近始若置不問無以令天下乃除僕射判汝州弼言新法臣所不曉不可以復治郡願歸洛養疾許之尋請老弼雖居家然朝廷有大利害知無不言弼常言君子小人如冰炭決不可以同器若兼收並用則小人必勝薰蕕雜處終必爲臭其爲宰相及判

河陽最後請老家居。凡三上章皆言天子無職事。惟辨君子小人而進退之。君子與小人並處。其勢必不勝。君子不勝。則奉身而退。樂道無悶。小人不勝。則交結黨援。千歧萬轍。必勝而後已。小人既勝。必肆毒於善良。無所不爲。求天下不亂。不可得也。

臣從彥釋曰。堯舜之時。垂拱無爲。而天下太平者。以其舉元凱去四凶也。夫君子與小人。相爲消長。雖文明之世。不能必天下無小人。雖亂世。不能必天下無君子。惟能辨之。使各當其分。此南面之事。而天子之所守者也。故進君子。遠小人。則爲宜其職。忠佞雜處。小人在位。是爲曠職矣。天子而曠其職。則亂亡而已矣。故秦之亡也。以李斯。漢之亡也。以張禹。唐之亂也。以林甫。國忠其亡也。以繁朴。不可不察也。富弼之言。其後王之龜鑑也歟。

羅豫章先生文集卷之七

邊堯錄七

司馬光

仁宗時擢天章閣待制兼侍講仍知諫院英廟初執政建言濮安懿王德盛位隆宜有尊禮詔太常禮院與兩制議翰林學士王珪等相顧不敢先光獨奮筆立議曰爲人後者爲之子不敢復顧其私親今日所以崇奉濮安懿王典禮宜一準先朝封贈期親尊屬故事高官大爵極其尊榮議成珪卽敕吏以光手橐爲案至今存焉時中外諮詢御史呂誨傅堯俞范純仁呂大防趙鼎趙瞻等皆爭之相繼黜降光上疏乞留之不可則乞與之皆貶

神宗卽位首擢光爲翰林學士光辭以不能四六帝面諭之仍遣內臣以告強之乃受遂爲御史中丞初中丞王陶論宰相不押常朝班爲不臣宰相不從陶爭之力遂罷光繼之言帝相不押班細故也陶言之過然愛禮存羊則不可已頃年宰相權重今陶復以言宰相罷則中丞不可復爲臣願俟宰相押班然後就職帝曰可

光在英廟時與呂晦同論祖宗之制句當御藥院常用供奉官以下至內殿崇班則出近歲居此位者皆暗理官資食其廩給非祖宗本意又故事年未五十不得爲內侍省押班今除張茂則止四十八不可

至是又言之。因論高居簡奸邪。乞加遠竄。章五上。帝爲盡罷寄資內臣。居簡亦補外。光又言近者王中正往陝西。知涇州劉渙等。諂事中正。而鄜延鈐轄吳舜臣。違失其意。已而渙等進擢。舜臣降黜。權歸中正。謗歸陛下。是去一居簡。得一居簡矣。上手詔問光所從知。光曰。臣得之賓客。非一人言。事之有無。惟陛下知之。若無臣。不敢避妄言之罪。萬一有之。不可不察。

臣從彥釋曰。唐制宦官之法最善。至明皇時。不知謹守。因高力士而輕變之。其源一起。末流不可復塞。自英廟以至神宗之初。光每與呂誨同論祖宗之制。蓋懲於此矣。王安石用事。又復啓之。蔡京特以爲奸。其權大盛。天下之士。爭出其門。根株蟠結。牢不可破。遂爲腹心痼疾。可勝言哉。今則祖宗之法。具在。但守之勿失。推之萬世。雖至於無窮可也。

王安石始爲政。創立制置三司條例司。建爲青苗助役均輸之政。置提舉官四十餘員。行其法於天下。謂之新法。光邇英殿進讀。至蕭何、曹參事。光曰。參不變何法。得守成之道。故孝惠高后時。天下晏然。衣食滋殖。帝曰。漢常守蕭何之法。不變可乎。光曰。何獨漢也。使三代之君。常守禹湯文武之法。雖至今存可也。書曰。無作聰明亂舊章。漢武帝用張湯言。取高帝法。紛更之。盜賊半天下。由此言之。祖宗之法。不可變也。後數日。呂惠卿進講。因言先王之法。有一年一變者。有五年一變者。有二十年一變者。光以爲不然。且曰。治天下者。譬如居室。弊則更之。非大壞不更造也。大壞而更造。非得良匠美材不成也。今二者皆無有。臣恐風雨之不庇也。公卿侍從皆在此。願陛下問之三司。使掌天下財。不才而黜之可也。不可

使兩府侵其事今爲制置三司條例司何也宰相以道佐人主安用例苟用例而已則胥吏足矣今爲看詳中書條例司何也惠卿不能對詆光曰光爲侍從何不言言之而不從何不去光答曰是臣之罪也帝曰相與論是非耳何至是呂惠卿講畢羣臣賜坐戶外將出命徒於戶內帝曰朝廷每更一事舉朝諮詢何也王珪曰臣疏賤在闕門之外朝廷之事不能盡知借使聞之道路又不知其虛實也帝曰聞則面言之光曰青苗出息平民爲之尙能以蠶食下戶至饑寒流離況縣官法令之威乎惠卿曰青苗法願取則與之不願不強也光曰愚民知取債之利不知還債之害非特縣官不強富民亦不強也帝曰坐倉糴米何如坐者皆起曰不便已罷之幸甚帝曰未罷也光曰京師有七年之儲而錢常乏若坐倉錢益乏米益陳奈何惠卿曰坐倉得米百萬斛則省東南百萬之漕以其錢供京師何患無錢光曰東南錢荒而米狼戾今不糴米而漕錢棄其有餘取其所無農末皆病矣侍講吳申曰光言至論也光曰此皆細事不足煩人主但當擇人而任之有功則賞有罪則罰此則陛下職也帝曰然文王罔攸兼於庶言庶慎惟有司之牧夫光趨出帝曰卿得無以惠卿之言不樂乎光曰不敢

韓琦上疏論青苗之害帝感悟欲罷其法安石稱疾求去會光拜樞密使上章力辭至六七曰陛下誠能罷制置條例司追還提舉官不行青苗等法雖不用臣臣受賜多矣不然不敢受命也帝遣人謂光曰樞密兵事也官各有職不當以他事爲辭光曰臣未受命則猶侍從也於事無不可言者安石起視事青苗法卒不罷光亦卒不受命尋以書諭安石三往反開諭切至猶幸安石之聽而改也因以諂諛指

惠卿曰覆王氏必此人也小人以利合勢傾利移何所不至後六年惠卿叛安石上書告其罪光求外補以端明殿學士出知永興軍頃之詔移許州不赴遂乞判西京留司御史臺以歸自是絕口不言事至熙寧七年帝以天下旱蝗詔求直言光讀詔書泣下欲默不忍乃復諫六事青苗等法曰此六者尤病民宜先罷之又以書責宰相吳充天子仁聖如此而公不言何也凡居洛十五年再任留司御史臺四任提舉崇福宮

神宗登遐光赴闕臨衛士見光入皆以手加額曰此司馬光相公也民遮道呼曰公無歸洛留相天子活百姓所在數千人聚觀之光懼會放辭謝遂徑歸洛太皇太后聞之詰問主者遣使勞光問所當先者光言近歲士大夫以言爲諱閭閻愁苦於下而上不知明主憂勤於上而下無所訴此罪在羣臣而愚民無知歸怨先帝宜下詔首開言路於是下詔榜朝堂而當時有不欲者於詔語中設六事以禁切言者光曰此非求諫乃拒諫也人臣惟不言言則入六事矣請改賜詔書從之於是四方吏民言新法不便者數千人光方草具所當行者上之而太皇太后已有旨散遣修京城役夫罷減皇城內覘者止御前工作出近侍之無狀者三十餘人戒敕中外無敢苛刻暴斂廢導洛司物貨場及民所養戶馬寬保馬限皆從中出大臣不與光上疏謝當今急務陛下略已行之矣小臣稽慢罪當萬死詔除光知陳州過闕入見使者勞問相望於道至則拜門下侍郎光力辭不許數賜手詔先帝新棄天下天子幼冲此何時而君辭位耶初神宗皇帝勵精求治安石用心過當急於功利小人得乘閒而入呂惠卿之流以

此得志後者慕之爭先相高而天下病矣。帝覺其非出安石金陵天下欣然意法必變。雖安石亦自悔之。欲稍自解而惠卿之流恐法變身危持之不肯。然帝終疑之。遂退安石八年不復召。而惠卿亦再逐不用。元豐之末天下多故。及哲宗嗣位。天下之民日夜引領以觀新政而進說者。以爲三年無改於父之道。欲稍損其甚者。毛舉數事以塞人言。光慨然爭之曰。先帝之法其善者。雖百世不可變。若安石。惠卿等所建爲天下害。非先帝本意者。改之當如救焚拯溺。猶恐不及。況太皇太后以母改子。非子改父。衆議乃定。

臣從彥釋曰。孔子曰。三年無改於父之道。此言孝子居喪。志存父在之道。不必主事而言也。況當易危爲安。易亂爲治之時。速則濟。緩則不及。則其改之。乃所以爲孝也。天子之孝。在於保天下。光不卽理言之。乃曰。以母改子。非子改父。以此遇衆議。則失之矣。其後至紹聖時。排陷忠良。以害於治。豈亦光有以召之耶。

光嘗謂治亂之機。在於用人邪正一分。則消長之勢自定。每論事必以人物爲先。凡所進退。皆天下之所謂當然者。然後朝廷清明。人主始得聞天下利害之實。遂罷保甲。團教。依義勇法。歲一閱。保馬不復買。見在者還監。牧給諸軍。廢市易法。所儲物鬻之。不取息。而民所欠錢。皆除其息。京東鑄鐵錢。河北。江西。福建。湖南鹽。及福建茶法。皆復其舊。獨川陝茶。以邊用未卽罷。遣使相視去其甚者。戶部左右曹錢穀。皆領之。尙書凡昔之三司使事。有散隸五曹及寺監者。皆歸戶部。使尙書周知其數量。入以爲出。

臣從彥釋曰。光之相也。天子沖幼。太皇太后臨朝。天下之事。聽其所爲。其所改法令。無不當於人心者。惟去元豐閒人與罷免役二者失之。夫天下之士。未有甘自爲小人者也。御之得其道。則誰不可使者。今皆指爲黨人。使不得自新人情天理。豈其然乎。故澆風一扇。名實大亂。世所謂善人君子者。特賈貨耳。可勝歎哉。安石之免役。正猶楊炎之兩稅。東南人實利之。若以堯舜三代之法格之。則去之可也。不然。未可輕議也。

程顥

仁宗時以進士及第。再調江寧上元簿。上元田稅不均。他邑尤甚。顥至爲令。畫法民不知擾。而一邑大均。會令罷去。攝邑事。上元劇邑。訴訟日不下二百。爲政者疲於省覽。奚暇及治道。顥處之有方。不閱月。民訟遂簡。嘗云。一命之士。苟存心於愛物。於人必有所濟。

仁宗登遐。遺制官吏成服三日而除。三日之朝。府尹率羣官將釋服。顥進曰。三日除服。遺詔所命。莫敢違也。請盡今日。若朝而除之。只二日耳。尹怒不從。顥曰。公自除之。某非至夜不敢釋也。一府相視無敢除者。再暮移澤州晉城令。

顥之治晉城也。民以事至邑者。必告之以孝弟忠信。入所以事父兄。出所以事長上。澤人淳厚。尤服其教。命於是度鄉村遠近。爲伍保。使之力役相助。患難相恤。而奸僞無所容。凡孤槩廢疾者。責之親戚鄉黨。使毋失所。行旅出於其塗者。疾病皆有所養。諸鄉皆有校。暇日親至。召父老而與之語。童兒所讀書。親

爲正句讀。不善者爲易置之。俗始甚野。不知爲學。顥擇子弟之秀者聚而教之。去邑才十餘年。服儒者服。蓋數百人矣。鄉民爲社會。爲立科條旌別善惡。使有勸有恥。邑幾萬室。三年之間。無強盜及鬪死者。顥自晉城罷。用薦者改著作佐郎。尋以御史中丞呂公著薦。授太子中允。權監察御史。裏行。神宗素知其名。召對之日。從容咨訪。比一二見。遂期以大用。每將退。必曰。頻求對來。欲常相見耳。前後進說甚多。大要以正心窒慾。求賢育才爲先。顥不飾辭辨。獨以至誠感動人主。

帝嘗使推擇人才。顥所薦者數十人。而以父表弟張載。及弟頤爲首。嘗言人主當防未萌之欲。帝俯身拱手曰。當爲卿戒之。及因論人才。曰。陛下奈何輕天下士。帝曰。朕何敢。如是言之至再三。

時王安石日益信用。顥每進見。必爲帝言君道。以至誠仁愛爲本。而未嘗急功利。一日極陳治道。帝曰。此堯舜之事。朕何敢當。顥愀然曰。陛下此言。非天下之福也。安石浸行其說。意多不合。事出必論。列數月之間。章數十上。若輔臣不同心。小臣預大計。公論不行。青苗取息等是也。安石與顥二人雖道不同。而嘗謂顥忠信。顥嘗被旨赴中書議事。安石方怒言者。厲色待之。顥徐曰。天下之事。非一家私議。願公平氣以聽之。安石爲之愧屈。顥每論事。心平氣和。安石多爲之動。而言路好大者。必欲力攻取勝。由是與言者爲敵。

方衆人論新法紛紛之時。安石以數事於上前。卜之以決去就。若青苗等議是也。大抵帝不欲抑安石。而安石之意。尙亦無必。但立法之始。恐人阻之。謂始不堅定。則其後必不能行。故執之也。顥謂曰。管仲霸

者之佐也。猶能言出令當如流水。以順人心。今參政苦要作不順人心事。何耶。但作順人心事。人誰不願從也。安石曰。此則感賢誠意。既而有於中書大悖者。安石大怒。遂以死力爭之。而黨與分矣。帝將黜諸言者。命執政除顥以江西路提刑。顥曰。使臣言是。願行之。如其妄言。當賜顯責。請罪而獲遷刑賞混矣。衆請得罷。改遷僉書鎮寧軍節度判官事。顥復求對見帝。帝曰。有甚文字。顥曰。今咫尺天顏尙不能少回。天意文字更復何用。欲去而上問者數四。顥每以陛下不宜輕用兵爲言。朝廷無能任陛下事者。

哲宗嗣位。覃恩改承議郎。顥雖小官。賢士大夫視其進退。以卜興衰。聖政方新。賢德登進。顥特爲時望所屬。召爲宗正寺丞。未行。以疾終。士大夫之識與不識者。莫不悲傷。爲朝廷恨惜。

顥之爲政治。惡以寬處煩而裕。初移澤州晉城令。在邑三年。百姓愛之如父母。後僉書鎮寧軍節度判官事。及知扶溝縣事。當法令嚴密之際。未嘗從衆爲應文逃責之事。人皆病於拘礙。憂爲甚難。而顥處之泰然。雖當倉卒。不動聲色。方監司競爲嚴急之時。其待之率皆寬厚。設施之際。有所賴焉。顥之所爲。綱條法度。人可效而爲也。至其道之而從。動之而和。不求物而物應。不施信而民信。則人不可及也。顥在扶溝時。扶溝地卑。歲有水旱。爲經畫溝洫之法。未及興工而去官。他日顥語人曰。以扶溝之地盡爲溝洫。必數歲乃成。吾爲經畫十里之地。開其端。使後人知其利。必有繼之者矣。夫爲令。必使境內之民。凶年饑歲。免於死亡。平居無事。有禮義之訓。然後爲善。故吾於扶溝。興設學校。聚邑人子弟教之。亦幾

成而廢夫百里之地至狹也而道之興廢係焉是數事皆不及成豈非命哉然知而不爲徒責命之廢興則非矣此吾所以不敢不盡心也

初安石得君自謂天下學者宗師以孔孟爲己任帝眷甚厚一日對顥因談安石之學顥曰安石之學不是帝愕然問曰何故曰臣不敢遠引止以近事明之臣嘗讀詩詩稱周公之德云公孫傾膚赤鳥几几周公盛德形容如是之盛若安石者其身之不能治何足以及此

顥常言王氏之於道只是說耳譬之繞塔說相輪非真有道者也有道者言自分明孟子言堯舜性之舜由仁義行是也若乃孔子則又異焉孔子於易中止曰立人之道曰仁與義則雖性字由字已不必道蓋陰陽剛柔仁義其理一也

顥自十五六歲時聞汝南周茂叔論道遂厭科舉之業慨然有求道之志而未知其要汎濫於諸家出入於釋老者幾十年反求諸六經而後得之明庶物察人倫知盡性至命必本於孝弟窮神知化由通乎禮樂辨異端似是之非開百代未明之惑秦漢而下未有臻斯理者也謂孟子沒而聖學不傳以興起斯文爲己任其言曰道之不明異端害之也昔之害近而易知今之害深而難辨昔之惑人也乘其迷暗今之入人也因其高明自謂之窮神知化而不足以開物成務言爲無不周徧實則外於倫理窮深極微而不可以入堯舜之道天下之學非淺陋固滯則必入於此自道之不明邪誕妖異之說競起塗生民之耳目溺天下於汙濁雖高才明智膠於見聞醉生夢死不自覺也是皆正道之榛蕪聖門之蔽

塞闢之而後可以入道。其教人自致知至於知止。誠意至於平天下。灑埽應對。至於窮理盡性。循循有序。病世之學者。舍近而趨遠。處下而窺高。所以輕自大而率無得也。其論王霸等篇。係教化之本原者。附之於左。

論王霸

臣伏謂得天理之正。極人倫之至者。堯舜之道也。用其私心。依仁義之偏者。霸者之事也。王道坦然。本乎人情。出乎禮義。若履大路而行無復回曲。霸者崎嶇反側於曲徑之中。而卒不可與入堯舜之道。故誠心而王。則王矣。假之而霸。則霸矣。二者其道不同。在審其初而已。易所謂差之毫釐。謬以千里者。其初不可不審也。故治天下者。必先立其志。正志先立。則邪說不能移。異端不能惑。故力進於道而莫之禦也。苟以霸者之心。而求王道之成。是銜石以爲玉也。陛下躬堯舜之資。處堯舜之位。必以堯舜之道。自任。然後爲能充其道。漢唐之君。有可稱者。論其人。則非先王之學。考其時。則皆駁雜之政。乃以一曲之見。幸至小康。其剏法立統。非可繼於後世者。皆不足爲也。然欲行仁政而不素講其具。使其道大明而後行。則或出或入。終莫有所至也。夫事有大小。有先後。察其小。忽其大。先其所後。後其所先。皆不可以適治。且志不可慢。時不可失。惟陛下稽先聖之言。察人事之理。知堯舜之道。備於己。反身而誠之。推之以及四海。擇同心一德之臣。與之共成天下之務。則天下幸甚。

論正學禮賢

臣伏謂君道之大在乎稽古正學明善惡之歸辨忠邪之分曉然趨道之正固在乎君志先定君志定而天下之治成矣所謂定志者正心誠意擇善而固執之者也夫義理不先盡則多聽而易惑志意不先定則守善而或移惟在以聖人之訓爲必當從先王之治爲必可法不爲後世駁雜之政所牽滯不爲流俗因循之論所遷惑信道極於篤自知極於明必期致治如三代之隆而後已也然天下之事患常生於忽微而志亦戒乎漸習故古之人君雖出入從容閒燕必有誦訓箴諫之臣左右前後無非正人所以成其德業伏願陛下禮命老臣賢儒不必勞以職事俾日親便坐講論道義以輔養聖德又擇天下賢俊使得陪侍法從朝夕進見開陳善道講磨治體以廣聞聽如此則聖知益明王猷允塞矣今四海靡靡日入偷薄末俗譏謔無復廉恥蓋亦朝廷尊德樂義之風未孚而篤誠忠厚之教尙鬱也惟陛下稽聖人之訓法先王之治正心誠意體乾剛健而力行之則天下幸甚

論養賢

臣竊以議當代者皆知得賢則天下治而未知所以致賢之道也是雖衆論紛然未極其要朝廷亦以行之爲難而不爲也三代養賢必本於學而德化行焉治道出焉本朝踵循唐舊而館閣清選止爲文字之職名實未正故招賢養才以輔時贊化將何從而致之也臣歷觀古先哲王所以虛己求治何嘗不盡天下之才以成己之德也故曰大舜有大焉善與人同樂取於人以爲善今天下之大豈爲乏賢而朝廷無養賢之地以容之徐察其器能高下而進退之也臣今欲乞朝廷設延英院以待四方之賢

凡公論推薦及巖穴之士必招致優禮視品給俸而不可遽進以官凡有政治則委之詳察凡有典禮則使之討論經畫得以奏陳而治亂得以講究也俾羣居切磨日盡其才使政府及近侍之臣互與相接陛下時賜召對訪以治道可觀其才器識能也察之以彙歲人品益分然後使賢者就位能者任職或委付郡縣或師表士儒其德業尤異漸進以師臣職司之任爲輔弼爲公卿無施之不稱也若是則引彙並進野無遺賢陛下尊賢待士之心可無負於天下矣

羅豫章先生文集卷之八

遵堯錄別錄

周衰孔子沒道學不明楊朱墨翟乃以其所學扇天下天下之言不歸楊則歸墨楊墨之道盛行當是時也。闢之者孟子一人而已自漢以來至於唐而釋老之徒又以其所學扇天下當是時也。闢之者韓愈一人而已。釋老之害過於楊墨。韓愈之賢不及孟子。然愈猶能闢之。異代同功。至今賴以爲功者也。昔者孔子道旣不行。懼人之溺於禽獸也。懼外裔之亂於中國也。於是作春秋。故春秋一書獨謹嚴。本朝熙寧初。粵有儒者起自江寧。以孔孟之道倡於時。以管商之法施於政。顛倒舜跖。奪其義心。混一莊揚。蕩於不法。正道荒蕪。士風一變。使蔡氏階之。以濟其亂。則其爲害不特釋老與楊墨爾。所以發天下之贖贖。望天下之晦晦者。當在陛下。比雖詔毀其像。未能廓如。故臣別錄司馬光陳瓘二人之言。以著其罪。

司馬光論王安石

仁宗嘉祐中。糾察在京刑獄。會帝升遐。而安石亦丁憂。服滿不起。其在江寧。平居淡然。一無所嗜好。惟以講學爲事。其朋游有自四方來者。神宗卽位。常一令赴闕。未幾擢翰林學士。遂大用之。安石旣得君。且恃其才。棄衆任己。變更祖宗法度。汲汲然以斂民財爲意。其所薦引多非其人。言路之臣。攻之者甚衆。

而翰林學士司馬光之言尤爲至切。帝不用光，又以書諭安石三往反不聽。熙寧七年，天下旱蝗，詔求直言。是時光判西京留司御史，於是上言，復以六事爲言。其大略曰：臣伏讀詔書，喜極以謂昔成湯以六事自責，今陛下旣已知之，羣臣夫復何云？曾子曰：尊其所聞，則高明矣；行其所知，則光大矣。陛下誠知其如是，斷然不疑，不爲左右所移，則安知今日災沴不如太戊之桑穀，高宗之鼎雉，更爲生民社稷之福乎？臣竊觀陛下英睿之性，希世少倫，卽位以來，勵精求治，恥爲繼體守文之常主，擢俊傑之才，使之執政，言無不從，計無不用。所舉者超遷，所毀者斥退，垂衣拱手，聽其所爲，推心置腹，人莫能間。雖齊侯之管仲，蜀先主之諸葛亮，殆無以過也。執政者亦悉心竭力，以副陛下之所欲，恥爲碌碌守法循故事之臣，每以周公自任。固宜百度交正，四民豐樂，頌聲旁洽，嘉瑞沓至，乃其效也。六年之間，百度紛擾，四民失業，怨憤之聲所不忍聞，災異甚大。古今罕有其故，何哉？豈非執政之臣所以輔陛下者，未得其道故耶？所謂未得其道者，在於好人同己，惡人異己是也。陛下旣全以威福之柄授之，使之制作新法，以利天下，是宜與天下共之。舍短取長，以求盡善，而獨任己意，惡人攻難，羣臣有與之同者，則擢用不次，有與之異者，則禍辱隨之。常人之情，誰肯去福而取禍，棄榮而就辱？由是躁於富貴者翕然附之，立得美官，其忠直有守者皆摈斥廢棄，或罹罪譴，一身之無所容。至於諫臺之官，乃天子耳目，所以規朝政之闕失，糾大臣之專恣，此陛下所當自擇，而使執政擇之。彼專用其所親愛之人，或少有違忤，則加貶逐，以懲後來，得諂諛之尤者，然後使爲之，然則執政之愆謬，羣臣之奸詐，下民之疾苦，遠方之冤抑，

陛下何從得見之乎。又奉法訪利害於四方者。亦其所親愛之人。皆先稟其旨意。憑其氣勢。以驅迫州縣之吏。善惡係其筆端。升沈由其口吻。彼州縣之吏。迎奉承順之不暇。何暇與之講利害。立同異哉。及其入奏。則云州縣之守宰。莫不以其所爲爲便。經久可行。陛下但見其文書。燦然可觀。以爲法之至善。咨謀僉同。豈知其在外之所爲哉。或者更增爲條目。務爲新巧。互陳利害。各事更張。使畫一之法。日殊月異。久而不已。吏民莫知所從。蓋由襲舊則無功。出奇則有賞故也。又令使者督責所在監司。監司督責州縣。上下相驅。競爲苛刻。奉行新法。稍有不盡力。則謂之非材不職。及沮壞新法。立行停替。或未熟新法。誤有違犯。皆不理赦。降去官。與犯賊罪者同。而重於犯私罪者。州縣之吏。惟奉行文書。求免罪戾之不暇。民事不復留心矣。又遣邏卒聽市道之人。謗議者執而刑之。又出榜立賞。募人告捕。誹謗朝政者。臣不知自古明王之政。固如是乎。昔堯稽於衆舍。已從人舜戒羣臣。予違汝弼。汝無面從。退有後言。此其所以爲帝王稱首也。秦惡聞其過失。殺直諫之士。禁偶語之人。及其禍敗。行道之人。皆知之矣。而已獨不知。此其所以爲萬世戒也。衛侯言計非是。而羣臣和者。如出一口。子思曰。以吾觀衛。所謂君不君。臣不臣者也。人主自臧。則衆謀不進。事是而臧之。尙卻衆謀。況和非以長惡乎。夫不察事之是非。而說人之讚已。暗莫甚焉。不度理之所在。而阿諛以求容。諂莫甚焉。君暗臣諂。以在民上。民不與焉。若此不已。國無類矣。子思言於衛侯曰。君之國事將日非矣。君出言自以爲是。而卿大夫莫敢矯其非。卿大夫自以爲是。而士庶莫敢矯其非。君臣旣自賢矣。而羣下同聲賢之。賢之則順。而有福。矯之則逆。而有

禍如是則善安從生。今執政立新法而羣下同贊之。有以異於衛國之政乎？是以士大夫憤懣鬱結。視屋竊歎而口不敢言。庶人饑寒憔悴怨歎號泣而無所控告。此則陛下所謂忠言讜謀鬱於上聞。而阿諛壅蔽其私者也。苟忠讜退伏。阿諛滿側。而望百度之正。四民之富。頌聲之洽。嘉瑞之臻。固亦難矣。今朝廷之缺政。其大者有六而已。一曰廣散青苗。使民負債日重。而縣官實無所得。二曰免上戶之役。斂下戶之錢。以養浮浪之人。三曰置市易司。與細民爭利。而實耗散官物。四曰中國未治。而侵擾四裔。得少失多。五曰排結保甲。教習凶器。以擾農民。六曰信狂狡之人。妄興水利。勞民費財。若其他瑣細。不足爲陛下道也。舍其大而言其細。舍其急而言其緩。外有獻替之迹。內懷附會之心。是奸邪之尤者。臣不敢爲也。陛下左右前後之臣。日譽新法之善者。其心亦知其不可。但欲希望聖心。附會執政。以盜竊富貴。一旦陛下之意移。則彼之所言異矣。臣今不敢復費簡札。敍六者利害。以煩聖聽。但陛下勿問阿諛之黨。勿徇權臣之意。斷志罷之。必有能爲陛下言其詳矣。此六者之中。青苗爲害尤大。又聞青苗之法。災傷及五分。則當倚閣官吏不仁者。止放四分以下稅。此尤可罪也。臣在冗散之地。若朝廷小小得失。固不得與聞。今坐視百姓困於新法如此。竊爲朝廷除憂。而陛下曾不知之。今年以來。臣衰病日增。萬一溘先朝露。有所不盡。長抱恨於黃泉。用是冒死爲陛下言之。陛下猶忽而不之信。此則天也。臣不敢復言矣。

臣從彥釋曰。異哉安石之爲人也。觀其平時。抗志義皇之上。其學聖人。必造孔氏淵源。其經術文章。

下視雄愈。及其立朝也。登對從容。每告其君。必以堯舜爲法。而自任以夔龍。神宗眷遇特厚。遂大用之。言無不聽。計無不從。一時之間。可謂明良相際矣。然攷其所存。則自私論。其所爲。則自耑。必求其實效。則捕風促影。之爲原。安石之心。其初實以儒者爲之。而其效一不應。其功烈曾不足以比管仲。是何也。易曰。差之毫釐。謬以千里。古人有之。安石無乃失之於此故耶。非臣愚所敢知也。惟興舍法。以經義易詞章。訓釋三經。挽天下學者從之。以爲先王一道德同風俗之意。果在於此。鼓之以名。導之以利。當是時也。安石方名重。自謂一世宗師。天下之人。誰不願從。故唱者雷震。應者風靡。遺風餘澤。淪入肌膚。不可去。民無有被其澤者。至今野叟能言其非。而誦其說於都人邑士之前。不笑以爲狂。則必怒也。蓋其所以入者。非朝夕也。此不足怪。大抵安石類伯鯀。才辨過人。初自江寧來。天下傾想。旣以才名擅天下。而又得君。遂謂海內無人。棄衆任己。執政未踰年。御史中丞呂誨奏疏極詆其非。然傷於太刻。有不當於人心者。今掇其衆所共知。顯顯者數事。著之於篇。庶幾以悟宸衷。且使天下後世。有所考證。云誨之言曰。安石自居政府。事無大小。必與同列異議。或因奏對。留身進說。多乞御批。自中而下。以塞同列。是則歸善於己。非則斂怨於君。此衆人之所同知也。宰相以道佐人主者也。於事無所與。旬日差除。安石皆自親之。凡近臣之不附己者。皆逐之。使外補。乃以爲出自聖意。矯誣不恭。作威害政。此亦衆人之所同知也。安石嘗奏對黼座之前。不考情實。惟事誣辨。比與唐介論謀殺刑名。以至誣譖。介忠勁之人。務守大體。不能以口舌勝之。不勝憤懣。發疽而死。自是同列罔不

忌憚雖丞相亦退避不敢與校此亦衆人之所同知也安石初入翰林未聞進士之賢者有弟安國人望未孚仍使同列共薦之朝廷以狀元恩例處之猶謂之薄文卷不優而主試之人遂擢中傷及居政府曾不半年竊弄威權無所不至自鬻希進者奔走其門怙勢招權浸成黨與此亦衆人之所同知也上方稽唐堯睦親之意友愛其弟以風天下爲大臣者當務將順反納小人章辟光建言以惑聰明意在離間遂成其事此亦衆人所同知也其終結之曰臣指陳猥瑣未免干犯誠恐陛下說其才辨日久歲深情僞不得知邪正無復辨羣陰迭進小人衆多則賢者必遯禍亂必至矣又曰臣推安石之迹固無遠略惟以立異於人誤天下蒼生者必此人也若安石久居廟廊必無安靜之理其大略如此已而果然是以天下旱蝗詔求直言而司馬光所陳略盡之矣方安石未用之時天下顥然必謂可致太平於是時也知其不可用者三人而已韓琦吳長文與呂誨是已而司馬光不與焉此三人者以經術文章較之皆出安石之下遠甚以政事言之則此三人者決不爲安石所爲則安石之經術文章祇以爲不祥之具而已故相繼論列者多矣惟誨與光獨任其責焉彼二人之言其理昭然不可謂不至也然帝不能用卒使禍亂成於蔡京之手庸非天乎

陳瓘論蔡京

哲宗時京與其弟卞俱在朝廷是時章子厚執政威福自己出京卞二人實贊道之姦德相濟太上皇卽位擢京爲翰林承旨京陰結權貴專務不德帝將有大用之意中外洶洶右司諫陳瓘力言之章十上

其尤切至者曰臣聞盡言招禍古人所戒言路之臣豈能免此臣伏見翰林學士承旨蔡京當紹聖之初弟兄在朝贊道章子厚共作威福卞則陰爲謀畫子厚則果斷力行且謀且行者京也哲宗篤於繼述一於委任事無大小信子厚不疑卞於此時假繼述之說以美私史子厚於此時因委任之篤自明己功京則盛推安石之聖過於神考又推定策之功毀滅宣仁以取合二子子厚之矜伐京爲有助卞之悖乖京實贊之當此之時言官常安民屢攻其罪京與子厚卞共怒安民協力排陷斥爲奸黨而孫謗董端逸陳次升因論京相繼黜逐哲宗晚得鄒浩不由進擬置之言路浩能忘身徇節上副聖知京又因其得罪而擠毀之七年之間五害言者揜朝廷之耳目成私門之利勢言路旣絕人皆鉗默凡所施行得以自恣遂使當時之所行皆爲今日之所蔽臣請略指四事皆天下之所以議京者也蔡卞之薄神考陛下旣知其惡矣伯仲相符壇籠如一事無異議罪豈殊科一黜一留人所未諭此天下之所以議京者一也邢恕之累宣仁陛下旣察其罪於是司馬光劉摯梁叢等皆蒙敍復京常奏疏請誅摯等家族審如京言則所以累宣仁者豈特邢恕一人而已哉在恕則逐之在京則留之何以塞邢恕不平之口而慰宣仁在天之靈乎此天下之所以議京者二也章子厚自明定策之功追貶王珪京亦自謂元豐末被命帶開封劖子攜劍入內欲斬王珪京之門人皆謂京於此時禁制宣仁京亦有社稷之功今陛下雪珪之罪還其舊官則是以珪之貶於子厚爲非也在子厚則非之在京則留之如是則子厚有辭矣珪有憾矣此天下之所以議京者三也子厚之初篤信京卞傾心降意隨此二人假繼述

之說以行其私三人議論如出一口自紹聖三年九月卞爲執政於是京始大怒而與子厚絕矣自今觀之京之所以與子厚絕者爲國事乎爲家事乎此天下之所以議京者四也陛下卽位之初以用賢去邪爲先而京之蒙蔽欺罔曾無忌憚陛下必欲留京於朝者其故何哉臣知陛下之意本無適莫而京之所以據位希進牢不可拔者則以韓忠彥曾布不能爲國遠慮輕率自用激成其勢故也京卞同惡天下所共知若用天下之言以合公議則顯正二人之罪不難也忠彥等不能出此託之師謀而出之太原雖加以兩制學士之職而實以詭計除之想當進擬之時必有不情之奏出奇設策不由誠心二聖安得無疑公議亦未以爲允及京之留布復爭辨再三之瀆無以取信相激之勢因此而成陛下進賢退邪法則堯舜然天下之心皆疑陛下有用京之意者以京之復留故也京之所以復留者以忠彥等去之不以其道故也去之不以其道則留之者生於相激萬一京果大用則天下治亂自此分矣崔羣謂唐之治亂在李林甫張九齡進退之時今京欺蔑先帝與甫無異而又歸過於先烈賣禍於子厚卞曲爲自安之計而陛下果留之矣今既可以復留則後不可以大用天下治亂之勢繫於一京崔羣之言可不念哉臣恐後之視今亦猶今之視昔禍亂之機亦不可以不早辨也陛下嗣位之初首開言路可謂知所先後矣臣愚首預茲選明知京在朝必爲大患而不能以時建言萬一有意外不虞之變陛下幡然悔悟誅責當時言事之臣則臣雖碎首陷胸何補於事此臣之所以憤懣而不敢默也臣嘗爲卞所薦與京無纖介之隙所以言之者爲國事爾非特爲國事也亦爲蔡氏也且京卞用事以來

籠絡薦引天下之士處要路得美官者不下數百人其閒材智藝能之士可用之人誠爲不少彼皆明知京下負國欲洗心自新捨去私門顧朝廷未有以招之耳臣謂京在朝廷則此數百千人皆指爲蔡氏之黨若去朝廷則此數百千人皆反爲朝廷之用所以消去朋黨廣收人才正在陛下果於去京而已此亦已用之術在昔熙寧之末王安石呂惠卿紛爭以後天下之士分爲兩黨神考患之於是自安石旣退惠卿旣出後不復用此兩人而兩門之士亦兼取而並用之也當時天下之士有王黨呂黨而朋黨之禍終不及於朝廷者以此然則消去朋黨之禍惟在去京而已今京關通交結其勢益牢共布腹心共成私計羽翼成就可以高飛愚弄朝廷有同兒戲陛下若不蚤悔漸成孤立後雖悔之亦無及矣自古爲人臣者官無高下干犯人主未必得禍一觸權臣破碎必矣或以爲離間君臣或以爲賣直歸怨或託以他事陰中傷之或於已黜之後責其怨望此古人之所以不免也臣豈敢自愛其身若使臣自愛其身則陛下不得聞京之罪矣國家內外無事一百四十一年矣古所無有甚可畏也譬如年老之人康強無疾日服溫暖猶恐氣衰至於保養陰邪必成腹心之疾伏望陛下謹保祖宗之業獨持威福之柄斷自宸衷果於去惡則天下幸甚取進止帝以瓘之所論不根罷右司諫添差監揚州糧料院尋改差知無爲軍瓘復上章條其事件曰臣上件所言在旣責揚州糧料院以前陛下若以臣言爲是則當如臣所請按京之罪明正典刑然後改臣差遣以示聽納若以臣言爲非則當重加貶竄乃得允當今京桀驁自肆無所畏憚而臣章屢上並未蒙降出則是陛下不以臣言爲信不信其言而輕於

改命傳之天下人必駭惑其爲聖政之累無大於此且京久在朝廷耑以輕君罔上爲能以植黨任數爲術挾繼述之說爲自便之計稍違其意則以不忠不孝之名加之脅持上下決欲取勝而後已主威不行士論憂恐京若不去必爲腹心之患宗社安危未可知也臣之一身遷貶榮辱何足道哉所有差知無爲軍敕命臣不敢祇受迤邐乘船前去揚州聽候指揮

臣從彥釋曰揚子稱樗里子之智也曰使知國如知葬則吾以疾爲蓍龜以甚言知國之難也陳瓘之論蔡京其吉凶禍福莫不兆見可爲國之蓍龜者矣然京終大用鞠爲禍福瓘言不售終斥逐流落以死於外王黼繼之遂召金人犯闕之變豈不甚可憫哉

羅豫章先生文集卷之九

議論要語

人主讀經則師其意。讀史則師其迹。然讀經以尚書爲先。讀史以唐書爲首。蓋尚書論人主善惡爲多。唐書論朝廷變故最盛。

朝廷立法不可不嚴。有司行法不可不恕。不嚴則不足以禁天下之惡。不恕則不足以通天下之情。漢之張釋之。唐之徐有功。以恕求情者也。常袞一切用法。四方奏請。莫有獲者。彼庸人哉。天下後世典獄之官。當以有功爲法。以袞爲戒。

人主欲明而不察。仁而不懦。蓋察常累明。而懦反害仁故也。漢昭帝明而不察。章帝仁而不懦。孝宣明矣。而失之察。孝元仁矣。而失之懦。若唐德宗則察而不明。高宗則懦而不仁。兼二者之長。其惟漢文乎。祖宗法度不可廢。德澤不可恃。廢法度則變亂之事起。恃德澤則驕佚之心生。自古德澤最厚。莫若堯舜。向使子孫可恃。則堯舜必傳其子。至於法度。則莫若周家之最明。向使子孫世守。則歷年至今猶存可也。

仁義者人主之術也。一於仁。天下愛之而不知畏。一於義。天下畏之而不知愛。三代之主。仁義兼隆。所以享國至於長久。自漢以來。或得其偏。如漢文帝過於仁。宣帝過於義。夫仁可過也。義不可過也。

名器之貴賤以其人何則授於君子則貴授於小人則賤名器之所貴則君子勇於行道而小人甘於下僚名器之所賤則小人勇於浮競而君子恥於求進以此觀之人主之名器可輕授人哉

周厲王監謗秦始皇偶語者棄市徒能禁於一時豈能禁之於萬世觀厲王之惡至秦之世而不可禁始皇之惡至漢之世而不可禁非惟不能禁於後世則又必有明白其是非者賢君所以專務修德而樂聞善言當時之臣故亦樂告以善道而成一代之治安彼二主不達此規規然徒禁一時之論難行事不善使人不敢議其非或致亡於一朝而取譏評於萬世不亦誤哉然想當時未必其身親爲不善也必有奸佞之臣濟之此可以爲世戒

仁義禮智所以爲立身之本而闕一不可故孟子以惻隱之心爲仁之端而無惻隱之心則非人以羞惡之心爲義之端而無羞惡之心則非人以辭讓之心爲禮之端而無辭讓之心則非人以是非之心爲智之端而無是非之心則非人李林甫爲宰相在廷之臣皆非人也掊克生靈無惻隱之心阿附宦官無羞惡之心勢利相傾無辭讓之心上下雷同無是非之心夫一端之亡亦非人矣況四端俱亡安得謂之人宜乎有天寶之亂也

君明君之福臣忠臣之福君明臣忠則朝廷治安得不謂之福乎父慈父之福子孝子之福父慈子孝則家道隆盛得不謂之福乎俗人以富貴爲福陋哉

老子曰禍兮福所倚福兮禍所伏指國家而言故晉武平吳何曾知其將亂隨文平陳房喬知其不久禍

福倚伏者其在茲乎

唐德宗之惡過於紂。孟子曰：賊仁者謂之賊。賊義者謂之殘。殘賊之人謂之匹夫。何則？仁義所以治天下之本。而紂皆殘賊之遂失天下。觀德宗之惡。詎止於賊仁義哉？社稷不亡幸矣。奸邪之人亂國政。李林甫是也。庸鄙之士弱國勢。張禹是也。荀子曰：權出於一者強。謂權出於一則主勢不分。而君道尊矣。後世宰相侵君之權。而不令終者多。賢如李文饒。尙不能免此。況李林甫之徒哉。爲人臣者。視此以爲戒。

王者富民。霸者富國。富民三代之世是也。富國齊、晉是也。至漢文帝行王者之道。欲富民而告戒不嚴。民反至於奢。武帝行霸者之道。欲富國而費用無節。國乃至於耗。

教化者朝廷之先務。廉恥者士人之美節。風俗者天下之大事。朝廷有教化。則士人有廉恥。士人有廉恥。則天下有風俗。或朝廷不務教化。而責士人之廉恥。士人不尚廉恥。而望風俗之美。其可得乎。

君子在朝。則天下必治。蓋君子進則常有亂世之言。使人主多憂。而善心生。故天下所以必治。小人在朝。天下必亂。蓋小人進則常有治世之言。使人主多樂。而怠心生。故天下所以必亂。

正者天下之所同好。邪者天下之所同惡。而聖賢未嘗致憂於其間。蓋邪正已明故也。至於邪正未明。則聖賢憂之。觀少正卯言僞而辨。行僻而堅。孔子則誅之。楊墨一則爲我。一則兼愛。孟子則闢之。皆邪正未明。而惑人者衆。此孔孟之所以汲汲。

繼志述事禮記獨指武王周公不可執定而行使宣王繼厲王志述厲王事可乎。

石守道采摭唐史中女后奸臣宦官事各以其類作三卷目之曰唐鑑而言曰巍巍巨唐女后亂之於前奸臣壞之於中宦官覆之於後考其所論可爲萬世鑑惜乎不推其本而言之故人主欲懲三者之患其本不過有二以內則清心以外則知人能清心則女后不能亂之能知人則奸臣不能壞之宦官不能覆之請借明皇一君而論開元能清心矣能知人矣武氏惠妃蕭嵩楊思勉豈能易其志及天寶之際不能清心矣不能知人矣而楊貴妃李林甫高力士遂亂其心清心知人其人主致治之本歟

天下之變不起於四方而起於朝廷譬如人之傷氣則寒暑易侵木之傷心則風雨易折故內有李林甫之奸則外有祿山之亂內有盧杞之邪則外有朱泚之叛易曰負且乘致寇至不虛言哉

三代法度秦盡變之然獨不去肉刑以此用心安得不遽滅

漢宣帝詰責杜延年治郡不進乃善識治體者夫治郡不進非人臣之大罪而宣帝必欲詰責之何耶蓋中興之際內之朝廷外之郡縣法度未備政事未修民人未安堵或治郡不進則百職廢矣烏可不責之夫一郡尙爾況天下乎予謂漢宣帝識治體

漢武帝知汲黯之賢而不用唐太宗知宇文士及之佞而去何其誤耶夫人主知賢而不能用未若不知之爲善知佞而不能去未若不知之爲愈苟知賢而不能用則善無所勸知佞而不能去則惡無所懲雖然武帝知賢而不用猶愈於元帝知蕭望之之賢而反罪焉太宗知佞而去猶愈於德宗知盧

杞之奸而復用焉。觀元帝、德宗、之與武帝、太宗、豈不相寥絕哉。

三代之治在道而在法。三代之法貴實而不貴名。後世反之。此享國與治安所以不同。士之立朝要以正直忠厚爲本。正直則朝廷無過失。忠厚則天下無嗟怨。二者不可偏也。一於正直而不忠厚。則漸入於刻。一於忠厚而不正直。則流入於懦。汲黯正直。所以諫公孫弘之阿諛。忠厚。所以諫張湯之殘刻。武帝享國五十五年。其臣之賢獨此一人而已。武帝反不用其爲君可知。

立朝之士當愛君如愛父。愛國如愛家。愛民如愛子。然三者未嘗不相賴也。凡人愛君則必愛國。愛國則必愛民。未有以君爲心而不以民爲心者。故范希文謂居廟堂之上。則愛其民。處江湖之遠。則憂其君。諒哉。

士之立身要以名節忠義爲本。有名節。則不枉道以求進。有忠義。則不固寵以欺君矣。

朝廷大奸不可容。朋友小過不可不容。若容大奸。必亂天下。不容小過。則無全人。

孔子曰。道之以政。齊之以刑。民免而無恥。以君言之。則宣帝、明帝。以臣言之。則趙廣漢、張敞。得之。又曰。道之以德。齊之以禮。有恥且格。以君言之。則文帝、景帝。以臣言之。則龔遂、黃霸。得之。君臣優劣。於此可見。聖人無欲。君子寡欲。衆人多欲。

路溫舒之見高矣。宣帝初立。政之寬猛。中外未嘗見之。而路溫舒首以尙德緩刑爲戒。援引古今。至於千古。其後蓋寬饒楊惲。以無罪見戮。果符溫舒之言。嗚呼。人臣見幾而能諫。人主聞善而能徙。然後君臣

兩盡其道溫舒見而能諫矣。宣帝聞善不能徙。惜哉。

昔季氏伐顓臾。孔子曰。吾恐季孫之憂不在顓臾而在蕭牆之內也。其後陽貨果囚季桓子。聖人之言可不爲萬世法哉。自三代而下。人主不師孔子之言。不戒季氏之事。而被蕭牆之害者多矣。成湯處心過於武王。成湯放桀于南巢。惟有慙德。曰。予恐來世以台爲口實。武王以受罪浮於桀。曰。今朕必往。則豈復有慙德哉。又湯誓。湯誥。數桀之惡淺。而泰誓。數紂之惡深。善乎。古人謂紂雖無道。不如是之甚者。誠知武王之心歟。

人君納諫之本。先於虛己。禹拜昌言。故能納諫。德宗強明自任。必能拒諫。

人之立身。可常行者在德。不可常行者在威。蓋德則感人也深。而百世不忘。威則格人也淺。而一時所畏。然德與威。不可偏廢也。常使德勝威。則不失其爲忠厚之士。苟威勝德。則未免爲鍛鍊之流。觀羊祜與杜預。俱守襄陽。後人思祜之深。而思預之淺者。豈祜尚德。而預尚威乎。

中人之性。由於所習。見其善。則習於爲善。見其惡。則習於爲惡。習於爲善。則舉世相率而爲善。而不知善之爲是。東漢黨錮之士。與夫太學生是也。習於爲惡。則舉世相率而爲惡。而不知惡之爲非。五代君臣。是也。

西漢人才。可與適道。東漢人才。可與立。三國人才。可與權。杜欽、谷永。可與適道。而不可與立。故附王氏、陳蕃、竇武。可與立。而不可權。故困於宦官。至於諸葛孔明。然後可與權。夫人才至可與權。則不可以有加。

張良近太公之才略。諸葛近伊尹之出處。然良佐高祖。論其時則宜。論其德則合。亮處三國。則材大任小。惜哉。

羅豫章先生文集卷之十

雜著

春秋指歸序

余聞伊川先生有緒言曰。三王之法。各是一王之法。春秋之法。乃百王不易之通法也。聖人以謂三王不可復回。且慮後世聖王之不作也。故作此一書。以遺惠後人。使後之作者不必德若湯武。亦足以起三代之治也。大略如此。春秋誠百王之通法耶。先儒之說。春秋不然。先儒紛紛不足道。此處有誤姑依原本孟子於聖門。蓋得其傳者也。曰。王者之迹熄而詩亡。詩亡然後春秋作。又曰。春秋其事則桓文。孔子成春秋。而亂臣賊子懼。此孟子之說春秋者也。然未嘗以春秋爲百王之通法也。伊川何從而得之哉。已而反求諸其心。不立一毫不失一曠。一以其言徵之。豁若夢覺。曰。春秋之爲春秋也。尙矣。乃今知之。自周室板蕩。宣王撥亂反正。其詩美之。小有吉日鴻雁。大有崧高烝民。不幸繼以幽王。而驪山之禍作焉。然而文武之澤未殄也。故平王東遷。人猶望其復興也。及其久也。政益衰。法益壞。黍離變爲國風。陵遲極矣。方是時也。去文王已五百餘歲矣。冠履顛倒。外裔亂華。天生聖人。又不見用。春秋於此時。儻不復作。天下不胥而爲禽獸者。吾不敢信也。故夫子因魯史二十二公。始隱終麟。以二百四十年之事。綱爲一代之典。善善而惡惡。是是而非。非非。寬不慢。猛不殘。文不華。實不陋。久而彌光。可以垂後世。傳無窮。真後世之懿範也。所謂考諸三王而

不謬百世以俟聖人而不惑者其此書之謂乎或者曰春秋其事則桓文孔子成春秋而亂臣賊子懼其信然乎曰春秋則自隱公以來征伐四出盟會紛然迨莊歷僖楚人犬爲中國患於時尊天子攘四裔使天下不遂左衽者桓文二公之力也故伐楚之役齊桓稱爵城濮之戰文公以霸自後世言之二公之功烈莫盛焉自三王之時言不免爲罪也首止之會河陽之狩是也夫子因其事而辭之以明王道故曰春秋其事則桓文古之聖人能以天下爲一家中國爲一人者非有甚高難行之行卓異之術也君君臣臣父父子子而天下治矣書曰天敍有典勅我五典五惇哉天秩有禮自我五禮有庸哉蓋典也禮也皆天也堯舜之治天下不越乎君臣父子之間而禮以文之者也故春秋誅一世子止而天下之爲人子者莫敢不孝戮一大夫盾而天下之爲人臣者莫敢不忠故曰孔子成春秋而亂臣賊子懼孟氏之言抑有由也或曰孔子刪詩書定禮樂贊易道三王之道盡於此矣而又作春秋何也曰五經論其理春秋見之行事春秋聖人之用也龜山嘗告人曰春秋其事之終歟學者先明五經然後學春秋則其用利矣亦以此也久矣哉春秋之揜於傳註也猶鑑揜於塵不有人焉刮垢磨光以還其明則是後之學者將終不覩聖人之心天下生靈將終不見三代之治而夫子生平之志將終不行理必無是也此伊川之所以有春秋傳也近世說春秋者多矣政和歲在丁酉余從龜山先生於昆陵授學經年盡衰得其書以歸惟春秋傳未之獲覩也宣和之初自輦下趨郊門人尹焞出以授予退而考合於經驗之以心而參之以古今之學蓋其所得者十五六於春秋大義譬如日月經天河海帶地莫不昭然微詞妙旨譬如璣衡之察時有

所見用是掇其至當者作指歸。又因前人纂集之功。分別條章。裁成義例者。作釋例未知中否。要須雍容自盡於燕閒靜一之中。遲之以歲月。積之以力。久優而游之。使自求之。饜而飫之。使自趨之。則於春秋之學。其庶幾乎。

韋齋記

宣和三年歲在癸卯之中秋。朱喬年得尤溪尉。常治一室。聚羣書。宴坐寢休其間。後知大學之淵源。異端之學。無所入於其心。自知辯急害道。名其室曰韋齋。取古人佩韋之義。汎觀古人。有以物爲戒者。有以人爲戒者。所謂佩韋。以物爲戒者也。人之大患。在於不知過。知過而思自改。於是。有戒焉。非賢者孰能之乎。予始以困。撝未能遂志。因作航齋。陸海中。且思古人所以進此道者。必有由而然。久之乃喟然歎曰。自孟軻氏歿。更歷漢唐。寥寥千載。迄無其人。有能自樹立者。不過注心於外。崇尚世儒之語而已。與之游孔氏之門。入於堯舜之道。其必不能至矣。夫中庸之書。世之學者。盡心以知性。躬行以盡性者也。而其始則曰。喜怒哀樂之未發。謂之中。其終則曰。夫焉有所倚。肫肫其仁。淵淵其淵。浩浩其天。此言何謂也。差之毫釐。謬以千里。故大學之道。在知其所止而已。苟知所止。則知學之先後。苟不知所止。則於學無自而進矣。漆雕開之學曰。吾斯之未能信。曾點之學曰。異乎三子者之撰。顏淵之學曰。回雖不敏。請事斯語矣。而孔子悅。開與點稱。顏回以庶幾。蓋許其進也。此予之所嘗自勉者也。故以聖賢則莫學而非道。以俗學則莫學而非物。喬年才高而智明。其剛不屈於俗。其學也。方進而未艾。齊成之明年。使人來求記於余。余辭以不

能則非朋友之義。欲蹈襲世儒之語。則非吾心。故以其嘗所自勉者。併書之。使人知其在此而不在彼也。或曰。韋齋之作。終無益於學也耶。曰。古之人。固有刻諸盤杆。銘諸几杖。置金人以戒多言。置欹器以戒自滿。聖人皆有取焉。苟善取之。則韋齋之作。不無補也。

延平先生答晦翁云。承錄示韋齋記。追往念舊。令人淒然。某中間所舉中庸始終之說。元晦以謂肫肫其仁。淵淵其淵。浩浩其天。卽全體是未發底道理。惟聖人盡性能然。若如此看。卽於全體處。何處不是此氣象。第恐無甚氣味爾。某竊以謂肫肫其仁。以下三句。乃是體認到此。達天德之效處。就喜怒哀樂未發處。存養至此氣象。儘有地位也。

誨子姪文

東鄰有千條家子。孫不肖。博奔飲酒。馳馬試劍。挾彈持弩。與羣小爲伍。見士人則逃遁。西鄰有百貫家子。孫不羞里巷。不顧父母。日復如是。諸子前行。路人肉杖之。曰。爲人子孫。固如是乎。二家之長。一日聚議曰。吾二家子孫不肖。如是之深。治之恐傷骨肉之情。不治之。則恐敗先君之業。若之何而爲是乎。旁有客曰。此乃至愚至賤之徒。終遭刑責而後已。吾將拉汝二人。訪諸南鄰萬斛之丈人。請問訓子孫之術矣。南鄰萬斛之家。數十人。入孝出弟。文行忠信。口不絕吟於六藝之文。手不停披於百家之篇。閨門之內。肅肅如也。閨門之外。雍雍如也。君之子孫若是。夫何爲而至是也。南鄰萬斛丈人曰。吾之誨子孫也。非鞭非笞。非詬非詈。但寫唐文人杜牧示小姪阿宜二句。又寫本朝宰執諸公倣杜牧示姪聯句。又寫范文正公家訓。

題東軒壁句。時人謂之東壁句。吾將示之倣倣。寫於東壁。示子孫尤佳。東西二丈曰敬聞命矣。願得本以寫於壁焉。

與陳默堂書

從彥承諭聖道甚微。有能於後生中。得一箇半箇。可以與聞於此。庶幾傳者愈廣。吾道不孤。又何難之不易也。

從彥聞尊兄此言。尤著意詢訪。近有後生李愿中者。向道甚銳。曾以書求教。趨向大抵近正。漫錄其書。併從彥所作小詩呈左右。未知以爲然否。

詩

觀書有感

靜處觀心塵不染。閒中稽古意尤深。周誠程敬應龐會。奧理休從此外尋。
自警

性地栽培恐易蕪。是非理欲謹於初。孔顏樂地非難造。好讀誠明靜定書。

示書生

知行蹊徑固非艱。每在操存養性間。此道悟來隨寓見。一毫物欲敢相關。

顏樂齋

山染嵐光帶日黃。蕭然茅屋枕池塘。自知寡與真堪笑。賴有顏瓢一味長。

邀月堂

矮作垣牆小作臺。時邀明月寫襟懷。夜深獨有長庚伴。不許庸人取次來。後改云·也知鄰闕非吾事·且把行藏付酒杯·

延平先生云。羅先生山居詩。侗記不全。今只據追思得者錄去。邀月臺詩云云。侗見先生出此語。後兩句不甚愜人意。嘗妄意云。先生可改下兩句。不甚渾然。先生改云。也知鄰闕非吾事。且把行藏付酒杯。蓋作此數絕時。正靖康閒也。

送南劍王守歸二首

三年政化被生民。甘雨祥風溢劍津。解組幡然賦歸去。攀轅無計可留恂。
未把陽關三疊吟。且將謬句寫離心。千尋浩浩鐸溪水。別恨不知誰淺深。

勉李愿中五首

願中以書求道甚力·作詩五首·以勉其意·然借視聽於聾盲·未知是否

聖道由來自坦夷。休述佛學惑他歧。死灰槁木渾無用。緣置心官不肯思。

學道以思爲上·孟子曰·心之官則思·書曰·思曰睿·睿作聖·惟狂

克念作聖·佛老法一切反是·

不聞雞犬鬧桑麻。仁宅安居是我家。耕種情田勤禮義。眼前風物任繁華。

今古乾坤共此身。安身須是且安民。臨深履薄緣何事。祇恐操心近矢人。
外吾聖人之學·申韓佛老子皆有書·在決擇也

吾道當無凝於物·

權門來往絕行蹤。一片閒雲過九峯。不似在家貧亦好。水邊林下養疏慵。

自述

松菊相親莫厭頻。紛紛人世只紅塵。自憐寡與真堪笑。賴有清風是故人。

題一鉢庵

可憐萱草信無憂。誰謂幽蘭解結愁。欲得寸田斷荆棘。只消一作祇長伴赤松游。

挽吉溪吳助教三首

室富真儒業。門多長者車。明經方教子。得第已榮家。性守仍知分。天然不愛奢。百年成古昔。行路亦咨嗟。新生誇躡躅。舊德歎凋零。冷帶商巖月。光凌處士星。布衣難得祿。白首易窮經。追想今何在。溪流對洞庭。

顏樂亭用陳默堂韻

平時仰止在高山。要以亭名樂內顏。顛倒一生渾是夢。尋思百計不如閒。心齋肯與塵汙染。陋巷寧容俗往還。堅守簞瓢心不改。恐流乞祭向墦間。

寄傲軒用陳默堂韻

自嗟踽踽復涼涼。餉口安能仰四方。目送歸鴻心自遠。門堪羅雀日偏長。家徒四壁樽仍綠。侯戶千頭橘又黃。我醉欲眠卿且去。肯陪俗客語羲皇。

灌纓亭用陳默堂韻

十載猶縉京洛塵。歸與那復廁朝紳。君今談笑青油幕。我但巍峩烏角巾。江漢更從尼父濯。衣冠寧羨屈原新。欲賡孺子滄浪詠。會意須還舍瑟人。

題靜亭

鼎瓶新亭靜更幽。四時景象鎮長留。端如和氣裏談笑。恍若春風中泳游。排闥山供藍色重。憑闌水擁璧光浮。我來登賞無窮趣。好把詩篇與唱酬。

送延年行

延年弟子也。不知何姓。以詩辭歸。先生用韻以餞其行。或曰。年與平字畫相似。疑即延平。謂李愿中也。

聖言天遠海潭潭。獨在潛心久泳涵。猥念百家非己好。妄將一貫與君談。賢如賜也才知二。學若陳亢只得三。此道悟來因自足。卻隨鵬鳥話圖南。

再用韻送延年

心源寂靜映寒潭。每欲操存更養涵。顧我日思攀劇論。荷君時與得高談。眼前舊識知多少。物外深交沒二三。幸久相親頻握手。遽成分別又東南。

和延年巖桂

幾樹芬芳檀與沈。枝枝若占鄒家林。風搖已認飄殘菊。日照渾疑綴散金。仙窟移來成美景。東堂分去結清陰。我今不願蟾宮折。待到蟾宮向上吟。

題德士退庵

牛頭山頂鐸煙霞。簷月松風卽我家。筏渡有情新活計。袋空無物舊生涯。已將黃葉分雙手。卻攜白茅占一窓。會得嬾慵歸去路。索然忘鳥更忘花。

賀田溪張公遷居

華構經營占地靈。濃嵐環合數峯青。苟完公子方成室。趨訓兒孫已過庭。豈止一時誇壯麗。定知百世享安寧。顧惟善頤非張老。祇貢湯盤往日銘。

和張公敍別古風

良工創新第。瀟灑侔洞府。經營未畢工。四面方興堵。蛟龍忽夜徙。空中震雷雨。親舊賀於門。主人迎孔戶。連喚鳳兒來。藏書多幾部。爲我張廣筵。酬賓酌以旅。人謂主公賢。敦樸曠峻宇。規模出心匠。務卑由乃祖。欲圖久安逸。勿辭暫勞苦。忠孝閨門家。詩禮光族緒。居室云苟完。謙沖彌自處。玉石不分別。鶴雞謾爲侶。顧予局促輩。鄉評少推許。嘗游莊嶽間。喜作齊人語。何幸天相之。幡然交鄒魯。早年欽大名。馳書聊以序。比來揖清風。談笑揮玉麈。見之名利盡。久侍豈無補。素志以深酬。青眼猶相與。默念湯盤頤。未爲傾肺腑。何當惠古風。錦繡施箋楮。妙曲誠寡和。取則憑柯斧。

先生白雲亭、獨寐龕、寄傲軒皆有詩及銘記數篇。以紙蠹朽、錄不能全。俟後搜尋真本、當得其錄旨。嘉定己卯中春屏山羅棠君美敬書。